

四庫全書

子部

欽定四庫全書總目卷一百二十六

子部四十六

類書類二

正蒙求三卷

浙江鮑士恭家藏本

元胡炳文撰炳文有周易本義通釋已著錄蒙求自李瀚以下仿其體者數家大抵雜採經傳事實隸以韻語以便童子之記誦然多以對偶求工不盡有關於法戒炳文是書則集古嘉言善行各以四字屬對成文而自注其出處於下所載皆有裨

幼學之事以視餌劄割裂僅供口耳者於啟導較爲切近上卷敘立教明倫之事中卷敘立身行已之事下卷敘待人接物之事畧以白鹿洞規爲準每卷一百二十句總爲三百六十句卷中又各有子目每一目多者二二十句少者不過四句中間以拘於駢儻格於聲韻故漏落甚多又如黃香暖席宜入父子之倫而反入幼學見趣條下陳子高讓田宜入長幼之倫而反入處宗族條下其分隸亦未能悉允然養蒙之教取其顯明易曉不貴以

淹博相高此書循諷吟哦以資感發與朱子小學外篇足相表裏固未可以淺近廢也

排韻增廣事類氏族大全二十卷

浙江巡撫採進本

不著撰人名氏書中所引事蹟迄於南宋季年蓋元人所編次相其板式亦建陽麻沙所刊乃當時書肆本也其例以十十分集每一集爲二卷依廣韻次第以四聲分隸各姓末一卷爲覆姓則以上一字爲韻而排次之每姓俱引史傳人物摘敘大略而採其中三四字爲標題大抵在擷取新穎以

供綴文之用姓未多別附女德婚姻一門歷敘古來淑媛及兩姓結婚故事蓋宋元之間婚禮必有四六書啟故載之獨詳亦以便於剽掇也葉盛水東日記曰近代雜書著述考據多不精如翰墨全書以彭思永爲明道母舅所謂氏族大全者尤甚如以趙明誠爲趙抃之子廣州十賢有李朝隱一作李尙隱因而訛爲李商隱今考中間所列朝代先後多顛倒失次如王導妾雷氏干預政事陳之張貴妃龔孔二嬪怙寵亡國而並入之女德則深

爲不倫又如韋思廉劉奉林諸人旣別立仙之一目而張果姜識諸人亦以仙術顯名乃仍混入人物之中無所區別體例亦殊疎舛至每姓之末間附韻藻數語如洪韻龐洪涵洪翁韻仙翁塞翁之類旣與氏族不相關涉且掛漏無取徒滋蛇足特據摭尙爲廣博有其人爲史傳志乘所不詳而獨見於此者頗足以資旁證至於王氏有臨沂太原二派勾氏避宋高宗諱分作敷姓蘭亭會詩名氏諸本之不同亦間附考訂寸有所長固未嘗無裨

於藝苑也

名疑四卷

河南巡撫採進本

明陳士元撰士元有易象鈎解已著錄是書上自三皇下迄元代博採史傳及百家雜說凡古人姓名異字及更名更字與同姓名者皆彙萃之其中如以司馬遷諱談爲同遂謂談同一音以童烏爲揚雄小字以揚雄本姓楊字訛爲揚字之類間有訛誤又神仙鬼怪之名如吳剛姮娥豐隆屏翳神荼鬱壘等皆詳載之體例亦頗冗雜然其採摭繁

富頤廣見聞如洞神部載三皇姓名列仙傳稱介  
子推姓王名光之類皆指駁其謬又據史記佞幸  
傳辨朱建傳誤閼孺爲閼籍孺據顏延之誄辨陶  
徵士名淵明字元亮亦皆有所根據存以備考固  
亦有資參證焉

荆川稊編一百二十卷

內府藏本

明唐順之編順之有廣右戰功錄已著錄是編義  
例畧仿章如愚山堂考索薈萃羣言區分類聚其  
大旨欲使萬事萬物畢貫通於一書故鉅細兼陳

門目浩博始之以六經終之以六官六經所不能盡則條次以九流諸家之學術凡爲類二十有七六官所不能盡則彍括以歷代之史傳凡爲類二十有五其門人左烝先爲之考校付梓烝沒而書多殘缺茅一相復加釐正刊行所引書名人名原本錯互不合者一相亦爲訂正然卷帙旣繁檢校難徧抵牾舛駁尙往往而有如程大昌詩議在所撰考古編中而乃以爲出自新安文獻志正諫本說苑篇名而標之爲論林泉高致集所載荆浩山

水賦李成山水訣乃其人所自作而槩以爲出郭思之手教陶孫字器之而訛作孫器之陶九成輒耕錄天闔之說與鑑戒無關而濫引入宦者門中褚淵王儉雖身事二姓然不可謂之佞臣乃列其傳論於偉門此類不知爲原本之訛爲茅一相之竄亂玉瑕珠穎累全書特以其網羅本富涉獵攸資當語錄盛行之時尚不失爲徵實之學錄備多識之一助固亦無不可焉

萬姓統譜一百二十六卷

直隸總督採進本

明凌迪知撰迪知有左國腴詞已著錄是書以古  
今姓氏分韻編次略仿林寶元和姓纂以歷代名  
人履貫事蹟按次時代分隸各姓下又仿章定名  
賢氏族言行類藁名爲姓譜實則合譜牒傳記而  
共成一類事之書也古者族系掌於官故周禮小  
史定世系辨昭穆南史王僧虔傳稱司馬遷仿周  
譜以作年表其體皆旁行斜上是其制也戰國策  
稱智果別族於太史爲輔氏是周末法猶未改秦  
漢以下始私相記錄自世本以下纂述不一其存

於今者惟林寶鄧名世鄭樵三家餘皆散佚然散見他書者尚可考見不過明世系辨流品而已迨乎南宋啟劄盛行駢偶之文務切姓氏於是錦繡萬花谷合璧事類各有類姓一門元人排韻氏族大全而下作者彌衆其合諸家之書勒爲一帙者則迪知此編稱賅備焉其中龐雜牴牾均所不免至於遼金元三史姓氏音譯失真舛訛尤甚然蒐羅旣廣足備考訂故世俗頗行用之亦未可盡廢也書前別有氏族博考十四卷大旨皆本之氏族

畧無大發明以其與原本相附而行今亦姑並錄之焉

翰林一百二十卷

兩江總督  
採進本

明徐元太撰元太字汝賢宣城人嘉靖乙丑進士官至刑部尙書是書採摭古人設譬之詞彙爲二編分十門每門又各分子目凡五百八十餘類歷二十餘年而後成用心頗爲勤至其引書用程大昌演繁露之例皆於條下注明里處併篇目卷第一一臚載亦迥異明人剽竊擣擣之習其自序稱

閱書四百餘種而檢其所列書名實不逾半殆約  
舉其數未及詳核歟其中隨手摭拾亦往往不得  
本始如兒說宋人善辯者一條本出韓非子周人  
有仕不遇者一條本出王充論衡皆引藝文類聚  
懷金玉者至不生歸一條本出後漢書耿弇傳而  
引文選李善注頭白可期汗青無日一條本出劉  
知幾史通而引事文類聚天寒卽飛鳥走獸尙知  
相依一條本出沈約所作阮籍詠懷詩注而亦以  
爲李善此類頗多又如以杜預何休范甯爲漢人

以陳壽爲魏人以李善爲隋人皆時代舛迕申培詩說天祿閣外史武侯心書之類皆明代僞書不能辨別廣成子本蘇軾從莊子摘出偶題此名乃別爲一書無能子云不知何代人皆未免失於疎畧然自六經以來卽多以況譬達意而自古未有彙爲一書者元太是編實爲羽例其蒐羅繁富零璣斷璧均足爲掇文者沾丐之資是亦不可無之一書矣

經濟類編一百卷

山東巡撫採進本

明馮琦編琦字琢菴臨朐人萬曆丁丑進士官至  
禮部尚書謚文敏事蹟具明史本傳是編爲琦手  
錄之稿粗分門類琦沒之後其弟瑗與其門人周  
家棟吳光儀稍爲排纂且刪其重複定爲帝王政  
治儲官宮掖臣諫諍銓衡財賦禮儀樂文學武功  
邊塞刑罰工虞天地人倫人品人事道術物雜言  
二十三類大致與冊府元龜互相出入但冊府元  
龜惟隸事迹此則兼錄文章冊府元龜惟以史傳  
爲據此則諸子百家靡不据拾體例少異耳其中

採摭繁富頗爲駁洽史稱琦明習典故學有根柢此亦可見一斑惟此書旣非琦所手校其間所錄諸條瑗等有所損而弗能益故或詳或畧不盡均齊又離析合併未必一一得琦本意故分隸亦間有叅錯然網羅繁富大抵採自本書究非明人類書輾轉稗販者比惟編內所收皆義屬正大而道術類中有神妖諸瑣說物類中有寶鼎琴酒諸瑣事槩以體例頗屬蕪雜是則尺璧不免於微瑕大木不免於寸朽分別觀之可矣

同姓名錄十二卷錄補一卷

浙江鮑士恭家藏本

明余寅撰周應賓補寅有乙未私志應賓有九經考異皆已著錄自梁元帝始著古今同姓名錄一卷見於隋書經籍志唐陸善經元葉森遞相增益其後漸佚惟永樂大典有此書而庋置禁庭世無傳本寅因上據經史旁摭稗官起自洪荒訖於元代先成四卷應賓以其未備搜而廣之後寅又自續八卷凡應賓所不欲載者悉掇拾無遺二人間有互異者如丙吉寅謂當姓邴陳涉博士孔甲寅

謂當作孔鮒之類其義以寅爲較長其他蒐採考覈訂訛辨異殊見駁博惟卷帙既多不無疎謬如知傳霖有二矣而宋之撰刑統賦者不與焉知周密有二矣而宋之撰齊東野語者不與焉秦徐市之市音勿因訛爲福不與漢徐福同孔門鄭邦史諱邦因改爲國不與韓水工同漢之塞決河者王延世而削去世字宋之進事類賦者吳淑而易吳爲李甚至同地名同神名同樂名同鳥獸蟲名一槩錄之尤爲紊雜然梁元帝本書簡略陸善經葉

森所續舛誤亦多此書據摭詳備足裨考証固未  
可以晚出廢之也

說略三十卷

浙江巡撫採進本

明顧起元撰起元有金陵古金石考已著錄是編  
明史藝文志作六十卷考起元自序全書實止三  
十卷與此本相合蓋明史偶誤也其書雜採說部  
件繫條列頗與曾慥類說陶宗儀說郛相近故明  
史收入小說家類然詳考體例其分門排比編次  
之法實同類書但類書隸事此則纂言耳雖其中

旁及二氏及參以怪異詭瑣之事嗜奇愛博不免駁雜然明代類書大抵剽竊餽釘無資實用起元所作尚頗有體裁凡所採摭大抵多出自本書不由販鬻其史別典述諸門尤爲有益於考證江南通志稱起元學問該博凡古今成敗人物賢否諸曹掌故無不通曉亦可見其梗槩云

天中記六十卷

直隸總督  
採進本

明陳耀文撰耀文有經典稽疑已著錄是編乃其類事之書以所居近天中山故題曰天中記世所

行本皆五十卷卷端亦不題次第草畧殊甚蓋初  
刻未竟之本惟此本作六十卷與明史藝文志合  
乃耀文之完書也明人類書大都没其出處至於  
鴻臚增損無可徵信此書援引繁富而皆能一一  
著所由來體裁較善惟所標書名或在條首或在  
條末爲例殊不畫一又第一卷內篇目已畢復綴  
以張衡靈憲一篇編次亦無條理然有明一代稱  
博洽者推楊慎後起而與之爭者則惟耀文所學  
雖駁雜不純而見聞終富故所採自九流瑟繙以

逮僻典遺文蒐羅頗廣實可爲多識之資每條間附案語如玉篇廣韻之解誕字爲生水經注之以苗茨堂爲茅茨堂世說注以錢唐爲錢塘唐逸叟之記孫思邈年代舛錯新唐書之載安祿山死日乖互皆爲抉摘其失又向來類書之沿訛者如合璧事類以狄兼暮爲魏暮錦繡萬花谷以浮圖泓爲一行事文類聚以劉漑爲劉溉萬卷菁華以晉建元元年爲漢武帝孔氏續六帖以三陽宮爲道暑宮皆一一辨證尤能於隸事之中兼資考據爲

諸家之所未及范守已曲消新聞謂是書鶴門無  
浮邱翁王子晉丁令威徐亞卿四事浦門無青浦  
黃浦等水頗譏其漏郭孔太書傳正誤亦謂其失  
載紫薇苑夫天下事物無窮一書卷帙有限自有  
類書以來未有兼括無遺者太平御覽卷帙盈千  
所未錄者尙不知凡幾況此五六十卷之書乎是  
固不足爲耀文病也

圖書編一百二十七卷

河南巡撫採進本

明章潢撰潢有周易象義已著錄是編取左圖右

書之意凡諸書有圖可考者皆彙輯而爲之說一  
卷至十五卷爲經義十六卷至二十八卷爲象緝  
厯算二十九卷至六十七卷爲地理六十八卷至  
一百一十五卷爲人道一百二十六卷爲易象類  
編一百二十七卷爲學語多識此二卷與圖譜無  
涉別綴於末蓋玉海附錄諸書例也其門人萬尚  
前序稱是編肇於嘉靖壬戌成於萬曆丁丑考潢  
年譜乃稱萬曆五年丁丑論世編成又稱萬曆十  
三年乙酉出圖書編與鄧元錫函史相證然則初

名論世編後乃改此名矣明人圖譜之學惟此編  
與王圻三才圖會號爲巨帙然圻書門目瑣屑排  
纂冗雜下至奕棋牙牌之類無所不收不及漢書  
之體要其所繫諸說亦皆捃掇殘剩未晰源流甚  
至軍器類中所列鞭鐗二圖稱鞭爲尉遲敬德所  
用鐗爲秦叔寶所用雜採齊東之語漫無考證亦  
不及漢書之引據古今詳賅本末雖儒生之見持  
論或涉迂拘然採摭繁富條理分明浩博之中取  
其精粹於博物之資經世之用亦未嘗無百一之

裨焉

駢志二十卷

浙江巡撫採進本

明陳禹謨撰禹謨有經籍異同已著錄是書取古事之相類者比而錄之對偶標題而各注其所出於條下不立門目但以甲至癸十干爲序而大較以類相從其中嗜博愛奇務盈卷帙如晏子宅晏子冢蘇秦宅蘇秦冢之類古來有宅有冢者豈能徧收秦趙高爲丞相漢趙高爲太守之類古來同姓名者更難悉數又如平仲君遷乃吳都賦之本

文橘不踰淮貉不踰汶乃考工記之成語因而採爲駢句名爲隸事實則鈔胥齊梁來儻偶之文亦恐罄竹難盡至於癸部所載及於經典一字之異同如浴乎沂沿乎沂詠而歸詠而饋則經典釋文且將全錄矣然所採既繁所儲遂富或一言而出典各殊或兩事而行踪相近多可以考證異同辨別疑似其中間有考證如漢高帝母溫姓駁司馬貞依托班固碑之類雖未必果確亦可存備一說大抵簡核不及趙崇綱之雞肋而博贍則勝方中

德之古事比也

山堂肆考二百二十八卷補遺十二卷

江蘇巡撫採進本

明彭大翼撰大翼字雲舉又字一鶴揚州人是書有萬曆乙未廖自伸序稱其冠軍諸生者廿有餘年竟不得一登賢書其弟大翹序則稱其宦游百越凌儒序亦稱其浩然解組杜門海上則又嘗隸仕籍其嘗爲何官則不可得詳矣據卷端凡例是書成於萬曆乙未浸淫散佚越二十餘年至萬曆己未其孫壻張幼學乃尋繹舊聞踵事增定遂成

完帙則幼學又有所附益不盡大翼之舊本也

案焦

此序作於乙未已稱幼學增定與凡例不符疑坊本翻刻訛已爲乙

案

凡分宮商角徵羽五集如趙璘因話錄例然璘著於五音之義各

有所取大翼此書則臣職一門割隸宮商二集親

屬一門割隸商角二集無所分別特以紀其部帙

如甲稿乙稿之類而已中分四十五門門又各分

子目大致與他類書相等惟卉原訓草而以草卉

標題似乎字複然考沈約詩有勿言草卉賤幸宅

天地中語則自有出典未可議也又道教神仙分

爲二部與他類書亦稍別考漢志道家神仙家原  
自分別則亦古義矣所收雖多掇拾羣籍不盡採  
自本書而網羅繁富存之亦足備參考焉

古儻府十二卷

江蘇巡撫採進本

明王志慶編志慶字與游崑山人天啟丁卯舉人  
是書以六朝唐宋駢體足供詞藻之用者採摭英  
華分類編輯其漢魏賦頌之類雖非四六而典實  
博麗已開對偶之漸者亦併取焉分十八門曰天  
文曰地理曰歲時曰帝王曰宮掖曰儲宮曰帝戚

曰人曰職官曰禮曰樂曰道術曰文學曰武功曰  
居處曰恩賚曰物類子目凡一百八十有二大槩  
仿歐陽詢藝文類聚之例或載全篇或存節本與  
他類書割裂餽釘僅存字句者不同所引止於宋  
以前又皆從各總集別集採出亦不似明人類書  
輒轉稗販冗瑣舛訛惟間收玉海所載偶句稍爲  
猥雜以例推之則吳淑事類賦將全部收入乎幸  
其偶一見之故尙不甚爲累也

廣博物志五十卷

浙江汪啟淑家藏本

明董斯張撰斯張有吳興備志已著錄晉張華博  
物志世所傳本真僞相淆簡略亦甚南宋李石嘗  
續其書雖旁摭新文尙因仍舊目斯張從而廣之  
遂全改華之體例變爲分門隸事之書凡分大目  
二十有二子目一百六十有七所載始於三墳迄  
於隋代詳畧互見未能首尾賅貫其徵引諸書皆  
標列原名綴於每條之末體例較善而中間亦有  
舛駁者如太平御覽太平廣記皆採摭古書原名  
具在乃斯張所引凡出自二書者往往但題御覽

廣記之名而沒所由來殊爲不明根據又圖經不言某州地志不言某代隨意剽掇亦頗近於稗販三墳爲毛漸僞撰漢雜事秘辛爲楊慎贊作世所共知乃好與喜新雜然並載更不免疎於持擇至若孔疏鄭箋牽連滿幅道經釋典採錄盈篇愛博貪多尤傷枝蔓然其蒐羅旣富唐以前遺文墜簡衰聚良多在明代諸類書中固猶爲近古矣

御定淵鑑類函四百五十卷

康熙四十九年

聖祖仁皇帝御定類書自皇覽以下舊本皆佚其存於今者惟北堂書鈔藝文類聚初學記六帖爲最古明俞安期刪其重複合併爲一又益以韓鄂歲華紀麗而稍採杜佑通典以補所闕命曰唐類函六朝以前之典籍頗存梗槩至武德貞觀以後僅附見題詠數篇故實則槩不及焉考輟耕錄載趙孟頫之言謂作詩纔使唐以下事便不古其言已稍過當明李夢陽倡復古之說遂戒學者無讀唐以後書夢陽嘗作黃河水繞漢宮牆一篇以末句用郭

汾陽字涉於唐事遂自削其稿不以入集安期編  
次類書以唐以前爲斷蓋明之季年猶多持七子  
之餘論也然詩文隸事在於比例精切詞藻典雅  
不必限以時代漢去戰國不遠而詞賦多用戰國  
事六朝去漢不遠而詞賦多用漢事唐去六朝不  
遠而詞賦多用六朝事今距唐幾千年距宋元亦  
數百年而曰唐以後事不可用豈通論歟况唐代  
類書原下括陳隋之季知事關勝國卽屬舊聞旣  
欲蒐羅理宜赅備又豈可橫生限斷使文獻無徵

是以我

聖祖仁皇帝特命儒臣因安期所編廣其條例博採元明以前文章事跡臚綱列目舊爲一編務使遠有所稽近有所考源流本末一一燦然計其卷數雖僅及太平御覽之半然御覽以數頁爲一卷此則篇帙旣繁兼以密行細字計其所載實倍於御覽蓋自有類書以來如百川之歸巨海九金之萃鴻鈞矣與佩文韻府駢字類編皆亘古所無之巨製不數宋之四大書也

御定駢字類編二百四十卷

康熙五十八年

聖祖仁皇帝勅撰雍正四年告成

世宗憲皇帝製序頒行謹案唐以來隸事之書以韻爲綱者自顏真卿韻海鏡源而下所採諸書皆齊句尾之一字而不齊句首之一字惟林寶元和姓纂鄧椿古今姓氏書辨證元人排韻事類氏族大全以四聲二百六部分隸諸姓於覆姓齊其首一字使以類從然皆書中之變例非書中之通例也凌迫

知萬姓統譜隨姓列名體例畧如韻府然亦以首  
一字排比其人非記事纂言之比也我

聖祖仁皇帝天裁獨運始創造是編俾與佩文韻府一齊  
尾字一齊首字互爲經緯相輔而行凡分十有二  
門曰天地曰時令曰山水曰居處曰珍寶曰數目  
曰方隅曰采色曰器物曰草木曰鳥獸曰蟲魚又  
補遺一門曰人事所隸標首之字凡一千六百有  
四每條所引以經史子集爲次與佩文韻府同而  
引書必著其篇名引詩文必著其原題或一題而

數首者必著其爲第幾首體例更爲精密學者據是兩編以考索舊文隨舉一字應手可檢較他類書門目紛繁每考一事往往可彼此可此猝不得其部分者其披尋之難易固迥不侔矣

御定分類字錦六十四卷

康熙六十一年

聖祖仁皇帝御定皆採掇成語裁爲駢偶分類編輯每類以二字三字四字爲次各詳引原書注於條下考類書全用對句始於隋杜公瞻之編珠然其書隋

志唐志皆不載至宋志始著錄而宋人無引用者亦無舊刻舊鈔流傳於世至康熙中乃有高士奇家刊本頗疑依託其灼然可徵者當自初學記之事對始然亦僅每門之內載有數條非全部如是其全部對句者以楊慎謝華啟秀爲稍博然犹摭未富篇帙無多標新異則有餘備採用則不足也是編所錄皆

石渠天祿之珍藏既多未睹之秘又仰遵

訓示體例詳明翦裁皆得其菁華配隸務權其銖兩遇麗

句可供文藻而單詞不可駢連者寧各依字數附綴於末謂之備用而不強爲之湊泊是以抽黃對白巧若天成合璧分璋詞如已出昔宋人四六喜綴成句一篇之內不過數聯而已宋人詩話又喜稱巧對如帶眼琴心殺青生白之類一集之內亦不過數聯而已至於累牘連篇集爲巨帙無一字一句之不工則自古以來未有逾於此編者矣

御定子史精華一百六十卷

康熙末

聖祖仁皇帝勅修雍正五年

世宗憲皇帝御定頒行四庫之中惟子史最爲浩博亦最  
爲蕪雜蓋紀傳編年以外凡稗官野記皆得自託  
於史儒家以外凡異學方技皆得自命爲子學者  
雖病其冗濫而資考證廣學問者又錯出其中不  
能竟廢卷帙所以日繁也或寒門細族艱於購求  
或僻壤窮鄉限於耳目則涉覽有所不能徧或貪  
多務得不別瑕瑜或嗜異喜新偏矜荒誕則持擇  
有所不能精於是刪纂之學興焉然摘錄之本如

庾仲容之子鈔

案子鈔世無傳本其文散見永樂大典中馬總之意林

簡畧不詳錢端禮之諸史提要疎陋寡緒楊侃之兩漢博聞林鍼之漢雋偏舉不全卽洪邁之經子法語諸史精語呂祖謙之十七史詳節亦未爲善本明人所輯叢脞彌甚益自鄙無譏

聖祖仁皇帝嘉惠藝林

特命纂輯此編俾共知津逮分三十類子目二百八十几言雋句採掇靡遺大書以標其精要分注以詳其首尾原原本本條理秩然繁簡得中翦裁有法

守茲一帙可以富擬百城於子史兩家誠所謂披沙而簡金集腋而爲裘矣

御定佩文韻府四百四十四卷

康熙五十年

聖祖仁皇帝御定考唐書藝文志載顏真卿韻海鏡源二百卷釋皎然陪顏使君修韻海畢東溪泛舟餞諸文士詩有外史刊新韻中郎定古文書華兼百氏縹雅備三墳句其自註又有魯公著書依切韻起東字脚語然則分韻隸事始自真卿今其書不傳

宋元間作者頗夥謂之詩韻

語詳韻府

羣玉條下

其傳於今

者惟韻府羣玉爲最古至明又有五車韻瑞然皆疎漏不完舛訛相踵楊慎作韻藻朱彞尊作韻粹其子昆田又作三體摭遺皆欲補陰氏凌氏之闕而仍未賅備是以我

聖祖仁皇帝特詔儒臣蒐羅典籍輯爲是編每字皆先標音訓所隸之事凡陰氏凌氏書所已採者謂之韻藻列於前兩家所未採者別標增字列於後皆以兩字三字四字相從而又各以經史子集爲次其

一語而諸書互見者則先引最初之書而其餘以次註於下又別以事對摘句附於其末原本不標卷第但依韻釐爲一百六卷而中分子卷二十有四今以篇頁繁重編爲四百四十四卷自有韻府以來無更浩博於是者俯視陰氏凌氏之書如滄海之於蠡勺矣考康熙五十九年大學士王掞等恭製韻府拾遺序有曰佩文韻府書成卷帙一百有六聞諸臣分纂之時每繕初稿先呈

御覽我

皇上十行並下點摘闕遺舉凡六經奧義箋詁之所難通

四部僻書棗梨之所未錄莫不

親加批乙宣付諸臣再三稽考雖諸臣衆手合作之書實

我

皇上一心裁定之書也云云蓋由

聖學高深爲千古帝王所未有故是書博贍亦千古著述

所未有也

御定韻府拾遺一百十二卷

康熙五十五年

聖祖仁皇帝御定以拾佩文韻府之遺也佩文韻府凡一萬八千餘頁藝林傳布已浩若望洋而

顧慮周詳猶恐滄海之兼收或有涓流之未會故

特命搜奇抉秘續輯是書其分韻悉準前編其所補則爲

例有四凡前編所有之字則惟增韻書之音切如

一東之東字注唐韻正韻德紅切集韻韻會都籠

切是也凡前編未收之字從他韻增入者則兼注

音義如二冬之膩字注廣韻正凶切集韻癡凶切

並音蹕與傭同集韻均也直也又注照廣韻增入

是也其文句典故爲前編所未載者謂之補藻東  
字下引禹貢北東諸條是也前編已載而所注未  
備者謂之補注東字下引周易折中集說居東諸  
條是也蒐羅賅備體例詳明大學士王掞等恭製  
序文所謂舉大而及其細則拾遺爲韻府之支流  
附少以成其多則拾遺爲韻府之全璧也

聖人制事精益求精不留絲毫之欠闕此亦一端矣舊本  
不標卷第與佩文韻府同今以一韻爲一卷其篇  
頁稍多者分六子卷爲一百十有二卷

格致鏡原一百卷

江蘇巡撫採進本

國朝陳元龍撰元龍字廣陵海寧人康熙乙丑進士厯官文淵閣大學士謚文簡是編乃其類事之書其曰格致鏡原者自昔類書大抵縷陳舊蹟與史傳相參或臚列典章與會要相佐此所採輯分三十類曰乾象曰坤輿曰身體曰冠服曰宮室曰飲食曰布帛曰舟車曰朝制曰珍寶曰文具曰武備曰禮器曰樂器曰耕織器物曰日用器物曰居處器物曰香奩器物曰燕賞器物曰玩戲器物曰穀

曰蔬曰木曰草曰花曰果曰鳥曰獸曰水族曰昆蟲皆博物之學故曰格致又每物必溯其本始略如事物紀原故曰鏡原也其採擷極博而編次具有條理又以明人類書多不載原書之名攘古自益因各考訂所出必繫以原書之名雖所據或間出近代之本不能盡泝其原而體例秩然首尾貫串無諸家叢冗猥雜之病亦庶幾乎稱精核矣其書爲康熙戊子丁亥間元龍歸養時所作後官廣西巡撫乃刊行之於粵中云

讀書紀數畧五十四卷

內府藏本

國朝宮夢仁編夢仁字定山泰州人康熙戊戌進士官至福建巡撫康熙四十六年

聖駕南巡夢仁方罷官里居因恭迎

六御以此書奏呈

御覽得

旨刊行遂併板繳

進至今存貯於

內府亦儒生之榮遇也前冠以

秦摺二通摺稱五十二卷此本實五十四卷或鋟木  
時析其兩卷歟其書分天地人物四大綱天部分  
子目四地部分子目十人部分子目二十九物部  
分子目十一凡諸書所載故實有數可紀者各以  
類從大抵以王應麟小學紺珠張九韶羣書拾唾  
爲藍本而稍摭宋元明事附益之較二家之書頗  
爲賅備每類先標目錄亦較二家之書爲易檢尋  
雖載籍極博未能包括無遺所載諸事又或不注  
所出然凡例稱數之可紀既數不勝數而汗牛充

棟之書更難盡讀茲不過就耳目所及見聞懼其畧而弗詳故名之曰畧又稱題下必注某書示不忘本也其間多有不注者大約世所習見之書亦或鈔時偶忘若原本所未注則彼先失記相沿已久且難徧考云云則夢仁固已自言之無庸執以相病矣

謹案倪國璉康濟錄仰蒙

皇上勅內直諸臣重爲刪潤併

賜嘉名官爲刊板故列於官撰諸書之中此書雖板貯

內府而旣非官撰亦非官刊不過與馬驥繹史同例  
故仍以作者時代爲次

花木鳥獸集類三卷

兩淮馬裕家藏本

國朝吳寶芝撰寶芝石門人是書集花木鳥獸故實  
分門臚列原本卷端題臣吳寶芝恭纂字當爲經  
進之本也上卷凡四十三目中卷凡四十二目下卷  
凡二十五目皆採掇舊文以供詞藻之運用旁及  
稗官小說下至詩詞佳句無不博引大旨主於湔  
滌陳因蒐羅新穎較諸家類書所載蹊徑頗殊中

間如三國典畧瑞應圖字說等書久已佚亡亦不免輒轉稗販之弊然搜奇抉異出於獨得者居多蓋清異錄之支流而全芳備祖之餘派也卷帙無

三而轉以少勝固勝於連篇累牘數見不鮮者矣

別號錄九卷

浙江鮑士恭家藏本

國朝葛萬里撰萬里號夢航崑山人其書取宋金元

明人別號以下一字分韻編輯宋金元人共一卷

明人八卷時彌近者彌易詳也考錢曾讀書敏求

記載有宋淳祐間錢塘徐光浦自號錄一卷載當

代名公鉅卿騷人墨士之號譚友聞序之其本爲元至正間華亭孫道明所鈔今未之見萬里此書蓋仿其例而廣之者也古人冠而稱字年過五十稱伯仲而已至左傳所載子產子美至於兩字並行已難辨識然猶無別號戰國策有寒泉子其爲氏爲號不可考商山四皓皆自有名姓而又有黃綺諸稱其別號之所昉乎自唐以後名目彌繁萬里序稱盛於南宋濫於明見者莫知爲誰誠爲確論惟其體例苟簡每韻惟第一人標兩字以下皆

但標一字驟觀殊不了了又宋金元但註時代明人則兼註爵里而爵止兩字里止一字亦費推求其中如坡韻收蘇軾之東坡而翁韻乃遺歐陽修之醉翁失之眉睫亦多遺漏要其採摭之勤實足以資考據雖似瑣屑而於史學有袖楊萬里之於院吏固時得一字師也

右類書類六十四部六千九百七十三卷皆文淵閣著錄

欽定四庫全書總目卷一百三十七

子部四十七

類書類存目一

聖賢羣輔錄二卷

山東巡撫  
採進本

一名四八目舊附載陶潛集中唐宋以來相沿引

用承訛踵謬莫悟其非邇以編錄遺書始蒙

睿鑒高深斷爲僞託

臣等仰承

聖訓詳悉推求乃知今本潛集爲北齊僕射陽休之編  
休之序錄稱其集先有兩本一本六卷排比顛亂

兼復闕少蕭統所撰八卷又少五孝傳及四八自今錄統所闕併序目等合爲十卷是五孝傳及四八目實休之所增蕭統舊本無是也統序稱深愛其文故加搜校則八卷以外不應更有佚篇其爲晚出僞書已無疑義且集中與子儼等疏稱子夏爲孔子四友而此錄四友乃爲顏回子貢子路子張又五孝傳引孝乎惟孝友于兄弟之文句讀尙從包咸註知未見古文尙書而此錄四岳一條乃引孔安國傳其出兩手尤自顯然至書以聖賢羣

輔爲名而魯三桓鄭七穆晉六卿魏四友以及仕  
莽之唐林唐遵叛晉之王敦並列簡編名實相迕  
理乖風教亦決非潛之所爲昔宋庠校正斯集僅  
知八儒三墨一條爲後人所竄入而全書之贗竟  
不能明潛之受誣已逾千載今逢右文

聖世得以辨別而表章之使白璧無瑕流光奕葉是亦  
潛之至幸矣

錦帶一卷

兩江總督  
採進本

舊本題梁昭明太子撰陳振孫書錄解題又云梁

元帝撰比事儻語在法帖中章草月儀之類詳其每篇自敘之詞皆山林之語非帝胄所宣言且詞氣不類六朝亦復不類唐格疑宋人按月令集爲駢句以備箋啟之用後來附會題爲統作耳今刻本昭明集中亦有之題曰十二月啟然昭明集乃後人所輯非其原本未可據以爲信也

錦帶補註一卷

浙江范懋柱家天一閣藏本

舊本題宋杜開撰其本較明人所刻多前序一篇不著撰人名氏詞旨頗鄙注文尤謬又出師古註

杜詩之下如開卷註昭明太子四字曰姓蕭名普  
字子施昭明者號也殆目未睹史書者其他所引  
論語德不孤必有鄰君子以文會友詩中心藏之  
何日忘之等數條爲有根據餘則無一不出杜撰  
疑亦妄人依托也

歲華紀麗四卷

內府  
藏本

舊本題唐韓鄂撰考唐書宰相世系表載韓休之  
弟殿中丞倩倩之子河南兵曹參軍滌鄂乃滌之  
曾孫也其書以四時節候分門隸事各編爲駢句

畧如北堂書鈔六帖之體唐志宋志皆列其名陳  
振孫書錄解題亦載之然久無傳本此本爲胡震  
亨秘冊函中所刻毛晉收其殘板以入津逮秘書  
者震亨跋稱得之鄭曉家王士禎居易錄以爲卽  
震亨僞造按錢曾讀書敏求記云歲華紀麗舊抄  
卷終闕字數行又失去末葉後見章邱李中麓藏  
宋刻本脫落正同是此書確出宋本不由震亨之  
依托然書錄解題稱其采經史子傳歲時事類聚  
而以儻句間之此本乃全作儻句已不相合又儻

句拙陋殊甚所引書不過數十種而割裂鉗釘往  
往不成文句且杜陽雜編蘇鶚所作鶚僖宗光啟  
中進士已届唐末據言王定保所作定保昭宗光  
化三年進士已入五代鄂安得引二人之書至中  
引四時纂要一條考之唐志是書卽鄂所作鄂又  
何至自引已作况鄂旣唐人不應稱唐元宗及唐  
時均屬疑竇曾所云云正未可據爲定論也

標題補注蒙求三卷

浙江鮑士恭家藏本

晉李瀚撰宋徐子光註書錄解題宋史藝文志皆

作八卷今所行者凡二本一本二卷乃子光之原  
註已著於錄此本又分三卷凡子光註中陳振孫  
所謂兼及他人事者皆爲刪去而每句之下俱有  
評識二字如好賢猶吏孝義廉介之類卽所謂標  
題蓋坊刻改纂之本不足取也

文選雙字類要三卷

浙江汪啟淑家藏本

舊本題宋蘇易簡撰易簡有文房四譜已著錄是  
編取文選中藻麗之語分類算輯其中語出經史  
偶爲漢以來詞賦采用者亦卽以采用之篇註爲

出典易簡名臣不應荒陋至此陸游老學菴筆記  
稱宋初崇尚文選草必稱王孫梅必稱驛使月必  
稱望舒山水必稱清暉方爲合格疑其時科舉之  
徒輯爲此書托易簡之名以行也

類要一百卷

浙江范懋柱家  
天一閣藏本

宋晏殊撰殊字同叔撫州臨川人景德初張知白  
以神童薦賜同進士出身擢秘書省正字官至集  
賢殿學士同平章事兼樞密使卒謚元獻事蹟具  
宋史本傳是編乃所作類事之書體例畧如北堂

書鈔白氏六帖而詳贍則過之葉夢得避暑錄話稱殊生平未嘗棄一紙雖封皮亦十百爲沓每讀書得一故事則批一封皮後批門類命書吏傳寫卽今類要也故所載皆從原書採掇不似他類書互相剽竊輒轉傳訛然自宋代所傳名目卷帙已多互異歐陽修作殊神道碑稱類集古今爲集選二百卷曾鞏作序則稱上中下帙七十四篇惟宋史本傳稱一百卷與今本合據其四世孫知雅州袤進書原表則南渡後已多缺佚袤續加編錄於

開禧二年上進故今書中有於篇目下題四世孫  
袤補闕者皆袤所增非殊之舊矣自明以來傳本  
甚罕惟浙江范氏天一閣所藏尙從宋本抄存而  
中間殘缺至四十三卷別有兩淮所進本僅存三  
十七卷門類次第尤多顛倒且傳寫相沿訛謬脫  
落甚至不可句讀蓋與太平御覽同爲宋代類書  
之善本而其不可校正則較御覽爲更甚故今惟  
附存其目焉

春秋經傳類對賦一卷

兩江總督  
採進本

宋徐晉卿撰晉卿里貫未詳自署稱將仕郎秘書省校書郎亦不知其始末也左傳文繁詞縟學者往往緯以儻語取便記誦見於宋史藝文志者有崔昇等十餘家今並亡佚惟此賦尚存凡一百五十韻一萬五千言屬對雖工而無當於義理其徵引亦多舛漏前有皇祐三年自序云首尾貫串十得八九殊未然也

國朝高士奇嘗爲之注通志堂經解亦收之未有元至大戊申長沙區斗英一跋稱江陰路總管太原

趙嘉山得善本授郡庠俾鋟梓云

文選類林十八卷

浙江范懋柱家  
天一閣藏本

舊本題宋劉攽撰攽字貢父新喻人攽之弟也與  
敞同舉慶厯六年進士厯官秘書少監出知蔡州  
後終於中書舍人事蹟具宋史本傳是編取文選  
字句可供詞賦之用者分門標目共五百四十九  
類然攽兄弟以文章學問與歐陽修蘇軾諸人馳  
騁上下未必爲此鉅訂之學疑亦南宋時業詞科  
者所依托也

記室新書七十卷

兩江總督採進本

舊本題宋方龜年編龜年莆田人景祐元年進士官至屯田郎中按宋史藝文志事類門載方龜年羣書新語十一卷福建通志亦載之作十卷均無記室新書之名考世傳抄本翰苑新書有明汎陽陳文燭序謂是宋人書抄自秘閣者無撰人姓氏凡分四集其別集十二卷卽此書之前十二卷其前集七十卷此書割去前十二卷以十三卷以下五十八卷續別集後仍足七十卷之數蓋坊賈得

殘缺翰苑新書併兩集爲一集改此名以售欺也

別本實賓錄一卷

浙江范懋柱家天一閣藏本

不著編輯者名氏卷首題曰蘇臺雲翁錄末誌正德五年五月望後蘇臺雲翁錄於西閣灣南之垂雲樓時年七十有七蓋明人抄本也核其所載卽節錄宋馬永易實賓錄非所自著亦非完書今馬氏原本已於永樂大典內編次成帙此爲棄餘矣以世所行者皆此本姑存其目焉

詩律武庫前後集三十卷

江蘇巡撫採進本

舊本題宋呂祖謙編與歷代制度詳說皆祖謙年譜所不載然歷代制度詳說具有條理且刊自元人亦有所授受此書則徵引故實大抵習見在類

書中最爲淺陋斷非祖謙之所爲殆後人依托也

補侍兒小名錄一卷

內府藏本

宋王銓撰銓字性之汝陰人自稱汝陰老民紹興初以薦詔視秩史官給札奏御爲樞密院編修官是書前有題詞云以續洪适之書考王林野客叢書謂洪駒父作侍兒小名錄或者又作續侍兒錄

則是洪芻非洪适然考侍兒小名錄拾遺稱少蓬  
洪公則作适爲是或王楙偶誤記歟銓本博洽而  
此書所採猥鄙殊甚錢希言戲瑕曰汝陰王銓著  
補侍兒小名錄雜出不倫所引霍小玉傳媒氏鮑  
十一娘一段殊與侍兒小名無當又載李文公集  
禽滑釐問於子墨子叔曰無恒姪女曰數奇妾曰  
善佞皆寓言也王丞相妾雷尚書是嘲戲之詞何  
預小名故事其抉摘頗當今觀其書如左傳蕭何  
叔子杜預之註甚明唐進士段何一條雲髻半髻

乃言其裝飾均非小名至唐人多呼婢爲小玉故元微之悼亡詩有小玉上床鋪夜衾句竇果一條有小玉驚人踏破裙句指爲小名亦殊舛誤尙不止希言之所詆矣

姬侍類偶二卷

浙江吳玉  
墀家藏本

宋周守忠撰守忠有養生襍纂已著錄是書成於嘉定庚辰有朝奉大夫鄭域中序及守忠自序其意仿侍兒小名錄其體則以四言隔句用韻如李瀚之蒙求凡八十有八聯通附見註中者共一百

八十二人其文屬對既拙又多漏畧大抵以太平廣記爲藁本而廣記中春條金釭之類乃遺不載亦兼采各家詩集而杜牧集中收張好好定子而遺其特作大篇之杜秋白居易集收樊素小蠻紫綃紅綃諸人而遺其最所賞鑒之都予以至文選玉臺新詠本非僻書而奏彈劉整文中之綠草汝南王所歌之劉碧玉亦都失載所註或有原委或無始末繁簡尤爲失當可謂簡陋之極域中席尤極荒謬如謂詩有媵記有妾禮有嬪春秋有姑以

記與禮分爲二書已爲首說所謂春秋有姤者更  
不知爲何語殆見他書引左傳燕姞夢蘭之事而  
影響勦說也非是人不序是書其斯爲各從其類  
歟

璧水羣英待問會元選要八十二卷

浙江巡撫採進本

宋建安劉達可編元華亭沈子淮選寧州查仲孺  
吳江徐珩批點俱不知何許人蓋麻沙書坊本也  
其書爲太學諸生答策而設故有璧水羣英待問  
之名分十六門每門之外分二例一曰名流舉業

又分立意發端稽古偉議法祖嘉猷時文警段綺  
語駢珠當今猷策生意收結等七子目二曰故事  
源流又分經傳格言皇朝典章歷代事實先正建  
議文集菁華等五子目大抵當日時文活套不足  
以資考證前有淳祐乙巳建安陳子和序亦極俚  
陋南宋侍太學之禮最重而當時相率誦習者乃  
此剽竊腐爛之書其亦大非養士之意矣

翰墨大全一百二十五卷

兩淮鹽政  
採進本

宋劉應李撰應李自稱鄉貢進士其里籍未詳是

書仿祝穆事文類聚之例分二十五門採摭頗博而贅駁亦甚下至對聯套語皆紛紛闡入尤爲穢瑣

四六膏馥七卷

永樂大典本

舊本題宋楊萬里撰其書割裂諸家四六字句分類編次以備擣擣其曰膏馥者蓋取元稹作杜甫墓誌銘殘膏剩馥沾溉無窮語也然萬里一代詞宗謬陋不應至此此必坊貰託名耳

南漢蒙求十一卷

永樂大典本

宋劉班撰班字希范吳興人仕至同知三省樞密院事是書仿唐李瀚蒙求之體取兩漢之事以韻語括之取便鄉塾之誦習於史學無所發明

續補侍兒小名錄一卷

內府藏本

宋溫豫撰豫字彥幾晉陽人豫以王鉉所補侍兒小名錄猶未詳備乃續補此書凡二十九事其中成風一條是謚非名至北夢瑣言所載之歸秦乃沈詢之奴名非其妾名豫改增嬖妾二字其謬甚矣

侍兒小名錄拾遺一卷

內府藏本

舊本題宋晉陽張邦幾撰前有邦幾自序曰少蓬  
洪公作侍兒小名錄好事者多傳焉王性之補錄  
一卷意語盡矣余友溫彥幾復得一卷以授余曰  
他日觀書有可采錄之乃作拾遺與晁公武讀書  
志合然公武稱舊本但題明溪先生不著名氏又  
稱或云董彥遠家子弟爲之彥遠乃董迥之字其  
子弟則不知爲誰此本爲明商維濬所刊獨題爲  
邦幾不知何據考維濬刻釋海此書與張邦基墨

莊漫錄相連豈因彼而誤作邦基又訛基爲幾耶  
錢希言戲瑕引作張邦畿則愈訛愈遠矣讀書志  
謂此書多用古字今不盡然蓋後人所改所載不  
甚簡擇如江蓮王魁一事皆猥鄙不足道又如大  
喬小喬乃孫策周瑜之妻以爲侍兒尤舛謬也

野服考一卷

編修程晉  
芳家藏本

宋方鳳撰鳳一名景山字韶卿浦陽人宋末授容  
州文學國亡不仕放浪山澤間與謝翹吳思齊友  
善此書摭取經史及說部所記野服之制自臺笠

緇撮以下凡十六條殆自托於宋之遺民故作此以見志歟

羣書類句二十七卷

永樂大典本

宋詹光大撰光大始末未詳其書以場屋之中每艱於屬對因每句必求其偶亦鄉塾剽竊之學前有蔡公亮序乃謂此書凡一千五百餘門字字編珠聯聯合璧世間無書則已有則必見於此書無對則已有則必萃於其類經史之格言文史之精語包羅鋪敘無一遺棄者云云其推許殊過當也

古今詩材八卷

永樂大典本

宋蕭元登撰元登爵里未詳是書取唐宋人詩分類編輯或錄全篇或割取一二聯及數句惟絕句則多全載間有評註皆雜取諸家詩話而稍參以已意取供剽竊無所別裁又出詩律武庫之下矣

十二先生詩宗集韻二十卷

兩淮鹽政採進本

宋裴良甫編案趙希弁讀書附志曰十二先生詩宗集韻二十卷裴良甫師聖編杜甫李白高適韓愈柳宗元孟郊歐陽修曾鞏蘇軾王安石黃庭堅

陳師道之詩韻所言與此書悉合卷末有淦川宋季用校正字書中殷改欣桓改歡用宋禮部韻標目蓋猶舊本然採摘詩句依韻分載顛倒割裂又削去原題使覽者茫然殊無義例不足取也

玉海纂二十二卷

內府藏本

明劉鴻訓編鴻訓字默成長山人萬曆癸丑進士官至文淵閣大學士事迹具明史本傳是編以王應麟玉海卷帙浩繁因節錄其要語部分悉依原目惟全刪其詞學指南一類詞學指南專爲當時

詞科而設刪之亦可至其全書正以典核詳贍爲長鴻訓刪存十之一二遂變爲記誦剽竊之本非著書之初指矣

訓女蒙求一卷

永樂大典本

宋徐伯益撰伯益爵里未詳是書仿李瀚蒙求之體類集婦女事迹爲四言韻語以括之皆習見之詞無足採錄

經學隊仗三卷

兩江總督採進本

舊本題朱景元撰景元不知何時人考晁公武讀

書志有唐太子諭德朱景元集然此書以道德心性等字分類標目而雜引經語以疏其義因詞皆對偶故以隊仗爲名實宋元時科舉策料決非唐人之書蓋姓名偶同也

八詩六帖二十九卷

永樂大典本

舊本題宋王狀元撰而不著其名蓋坊賈所爲之贗本八詩者李杜韓柳歐王蘇黃之詩六帖者竊白居易之名也分類猥瑣摘句割裂如標懸高名三字爲題註曰安知天漢上白日懸高名標動千

古三字爲題註曰芳名動千古甚至標無窮二字  
爲題註曰清芳播無窮全書謬陋大抵類此真無  
一長可採也

諸史偶論十卷

兩淮鹽政  
採進本

舊本題進士柳州計宗道校考太學題名碑宏治  
己未科進士有計宗道馬平人馬平爲柳州府屬  
蓋卽其人然自題曰校則非其所著觀書中所引  
史事唐以前爲多五代僅桑維翰敬翔諸人寥寥  
數條當爲宋人作也書中分三十五門一百九十

七子目每目各引二事爲案或相似者如孔光所奏削橐戴胄亦所奏削橐之類有相近而不同者如劉行本置笏求退周宣帝謝之褚遂良置笏求退唐高宗命引出之之類有相反者如婁敬以舌得官賀若弼以舌死之之類其體例在史評類書之間蓋以備程試答策之用者其持論迂濶亦確出南宋人云

裁纂類函一百六十卷

浙江汪啟淑家藏本

不著撰人名氏其書雜錄冊府元龜之文而刪易

其篇目前有虞集序稱相臺廬陵周宏道先生所著考道園學古錄不載此文所謂宏道先生亦無所考據其文意推之蓋周必大平園集外尙有著述八十餘種不傳姦黠書賈因僞造此書以依托求售旣訛必大之字洪道爲宏道又以必大先世鄭州人而加相臺二字於廬陵之上觀其序詞旨鄙俚可資笑噱正不足與辨真贗也

萬卷菁華前集八十卷後集八十卷續集三十四卷

浙江

范懋柱家天

一閣藏本

不著撰人名氏亦無序跋觀其體例蓋宋人科舉  
之書也前後集皆分一百七十門每門又分子目  
一日之中首以名君事要名臣事要亦間有增入  
聖賢事要及君臣事要合編者次事括則雜錄也  
次譬喻次反說譬喻皆借事寓意之文反說者皆  
反覆申明之論也次賦偶次賦隔皆摘錄程試之  
句賦偶者兩句對賦隔者四句對也續編冠以歷  
代世系譜前二十二卷爲帝王次九卷爲名臣後  
三卷爲聖賢亦各以事實議論隸於諸人之下皆

餽釘殘臘之學殊無可取

三場通用引易活法九卷

永樂大典本

不著撰人名氏蓋南宋人取說易之詞分類排比以備場屋之用者也其詞雖皆解易而其體則全爲類書不可復列之經類故改隸子部焉

啟劄雲錦裳八卷

永樂大典本

不著撰人名氏亦不詳時代其書以書劄泛詞分類編次門目猥雜字句庸腐蓋至陋之俗書然永樂大典全部收之則猶元以前本矣

卷之三  
類書存目  
十一  
啟劄錦語七卷

永樂大典本

不著撰人名氏亦不詳時代與啟劄雲錦裳並載  
永樂大典中其體例相同其猥鄙亦如出一轍  
啟劄淵海二卷

永樂大典本

不著撰人名氏首載四六體式次曰四六名對次  
曰四六警對次曰全篇式次曰時令類又有起居  
神祐申訴合照候問頌德敘官自敘諸式亦俗書  
也

聚課瓊珠詩對九卷

永樂大典本

不著撰人名氏亦不詳時代皆以淺俗對句分類編次每類之中又分一字二字三字四字等目蓋村塾課蒙之作

對屬發蒙二卷

永樂大典本

不著撰人名氏共八十一門分類至爲瑣屑如節候門有云上數目下節候如三春三冬之類又云上虛字下節候如新春先春之類又云上節候下聲色如春光春容之類在俗書之中亦至下者也

賦學剖蒙二卷

永樂大典本

不著撰人名氏其書割裂舊文分類編輯字句陳  
因更多牽湊其標目尤爲鄙陋如將字類必字類  
之屬皆自爲一門是直剽竊之活套而已

啟劄青錢十八卷

永樂大典本

不著撰人名氏所載手書正式一曰具禮二曰稱  
呼三曰敘別四曰瞻仰五曰卽日六曰時令七曰  
伏惟八曰燕居九曰神相十曰尊候十一曰托庇  
十二曰入事十三曰未見十四曰祝頌十五曰不  
宣亦近日書柬活套之濫觴也

敏求機要十六卷

編修汪如藻家藏本

舊本題月梧劉實撰鳳梧劉茂實注而撰人於劉字之下寶字之上空一字疑二人兄弟本以寶字連名舊本模糊傳寫者因於撰者之名空一字也前有自序不著時代考書中歷代帝王條稱宋自庚申至丙子三百一十七年止不數星朞二王知爲元人所作書中尙往往稱大宋則宋遺民也其書以歷代故實編爲歌括以便記誦卷一二三爲歷代帝王卷四五爲歷代聖賢羣輔卷六爲稱號

相同卷七爲經書卷八爲諸子卷九爲史書卷十  
爲天文律呂節候卷十一爲地理山澤卷十二爲  
官制沿革卷十三爲文武制度法禁卷十四爲綱  
常德行道藝卷十五爲人品身體卷十六爲物產  
服食器用蓋鄉塾課蒙之本然其考證頗不苟如  
五德之運篇中稱張倉水德說不行土德賈誼嘗  
推明公孫臣引黃龍見從此漢運以土更漢末方  
申火德說赤伏符識不虛設東漢火德開中興蜀  
雖正統竟微絕云云於王莽劉歆始以漢爲火德

之事考之最明視通鑑誤載淳方成語於成帝時  
卽言火德者轉爲精核是亦可有所長矣

古賦題十卷後集五卷

永樂大典本

舊本題天歷己巳古雍劉氏翠岩家塾識蓋元仁  
宗時所刊其劉氏名字則不可考矣前有自序曰  
宇宙間事物皆可賦然羣書不能遍觀而歷考也  
文場寸晷未免有望洋之嘆今於經史子集類纂  
賦題十卷各疏本末其下鋟梓以行又於庚午春  
續爲後集五卷云云考宋禮部貢舉條例載出題

必具其出處所列如周以宗強賦則註曰以周以同姓強固王室爲韻依次用限三百六十字以上成又大書其後曰出史記敘管蔡世家曰周公主盟太任十子周以宗強嘉仲改過云云故宋人有備對策論經義之書無備詩賦題之書至元此制不行故錢惟善集載有鄉試以羅刹江賦命題鑑院三千人不知出處之事此書之所以作歟

類編古今事林羣書一覽十卷

江西巡撫採進本

舊本題宋祝穆撰止有地理一門體例亦與穆方

輿勝覽相近然卷首卽爲大興府決非穆所作矣  
以下僅有江南諸路而江北諸路全闕目錄後有  
陸續梓行之語蓋元人未完之本也

增修詩學集成抑韻淵海二十卷

浙江巡撫採進本

元嚴毅撰毅字子仁建安人其始末未詳惟卷首  
有後至元庚辰張復序知爲元人爾其書體例與  
韻府羣玉相近而更爲簡畧每字之下首列活套  
次爲體字體字者如東字下列青位震方四字童  
字列兒曹二字卽宋人所謂換字也次爲事類次

爲詩料則多採五言七言詩句而不著其姓名所載惟有上下平聲而無仄聲蓋專爲近體設又止二十九部其三江一部因韻窄字少刪之不載其猥陋可想見也

羣書鉤元十二卷

浙江巡撫採進本

元高恥傳撰恥傳臨邛人是書雜採古事古語以字數爲標目次第自一字起至七字止其不能限以數者別爲贍炙句二卷其一字類不能成句則以古文奇字當之龐雜殊甚後附刪節通鑑一卷

題曰建置沿革又附陳騤文則一卷更無倫理前有至正七年恥傳自序乃盛自夸飾過矣

聲律發蒙五卷

內府藏本

元祝明撰潘瑛續明劉節校補據高儒百川書志云聲律啟蒙二卷元博陵安平隱者祝明文卿撰自一字七字至隔句各押一韻對偶渾成音響自合共九十首則此編前二卷爲明書後三卷瑛所續也瑛不知何許人節有春秋列傳已著錄其書每一韻先列韻字與註而後列雜言對屬之語蓋

爲初學發蒙而作無所當於著述百川書志所云未免過情之譽也

別本聲律發蒙六卷

編修周永年家藏本

元祝明撰原書二卷此本作五卷蓋後人所分未附歌一卷題曰黃石居士撰不知爲誰每卷又題馬崇儒重訂亦不知何許人據書中前後題識蓋嘉靖中衡王府醫正也

四六叢珠彙選十卷

浙江汪啟淑家藏本

舊本題當塗縣學官晉江王明嶅繁昌教諭黃金

璽同校選不著時代前有明蔡序稱宋季葉氏採當代名家彙集成編名曰四六叢珠分門數百帙累千云云則卽宋人四六叢珠舊本而爲之摘錄者也故其職官輿圖皆南宋之制然止摘偶句不列姓名徒供剽掇之用則亦村塾兔園冊耳

永樂大典二萬二千八百七十七卷目錄六十卷

翰林院藏

本

明永樂元年七月奉勅撰二年十一月奏進賜名

文獻大成總其事者爲翰林院學士兼右春坊大

學士解縉與其事者凡一百四十七人旣而以所纂尙多未備復命太子少保姚廣孝刑部侍郎劉季箎與縉同監修而以翰林學士王景侍讀學士王達國子祭酒胡儼司經局洗馬楊博儒士陳濟爲總裁以翰林侍讀鄒輯修撰王褒梁潛吳溥李貫楊覲曾棨編修朱紘檢討王洪蔣驥潘畿王偁蘇伯厚張伯穎典籍梁用行庶吉士楊相左春坊左中允尹昌隆宗人府經歷高得暘吏部郎中葉砥山東按察司僉事晏璧爲副總裁與其事者凡

二千一百六十九人於永樂五年十一月奏進改

名曰永樂大典

案以上俱見明實錄

併命復寫一部鋟諸

梓以永樂七年十月訖工

案事見明趙友同存軒集送禮部員外郎劉公

復命序後以工費浩繁而罷

案事見舊京詞林志

定都北京以後移貯文樓

案文樓卽今弘義閣

嘉靖四十一年選禮部

儒士程道南等一百人重錄正副二本命高拱張

居正校理

案事見舊明實錄至隆慶初告成仍歸原本於南

京

案事見舊京詞林志其正本貯文淵閣副本別貯皇史宬

案事見春明夢餘錄明祚旣傾南京原本與皇史宬副本並

燬今貯翰林院庫者卽文淵閣正本僅殘闕二千四百二十二卷顧炎武日知錄以爲全部皆佚蓋傳聞不確之說書及目錄共二萬二千九百三十七卷與原序原表並合明實錄作二萬二千二百一十一卷明史藝文志作二萬二千九百卷亦字畫之悞也考明實錄載成祖諭解縉等稱嘗觀韻府回溪二書案回溪謂回溪史韻也事雖有統而採摘不廣紀載太畧爾等其如朕意凡筆墨以來經史子集百家之書至於天文地志陰陽醫卜僧道技藝之

言備輯爲一書無厭浩繁云云故此書以洪武正韻爲綱全如韻府之體其每字之下詳列各種書體亦用顏真卿韻海鏡源之例惟其書割裂龐襍漫無條理或以一字一句分韻或析取一篇以篇名分韻或全錄一書以書名分韻與卷首凡例多不相應殊乖編纂之體疑其始亦如韻府之體但每條備具始末比韻府加詳今每韻前所載事韻其初稿也繼以急於成書遂不暇逐條採掇而分隸以篇名既而求竣益迫更不暇逐篇分析而分

隸以書名故叅差無緒至於如此然元以前佚文  
秘典世所不傳者轉賴其全部全篇收入得以排  
纂校訂復見於世是殆天佑斯文姑假手於解縉  
姚廣孝等俾彙存古籍以待

聖朝之表章有莫知其然而然者正不必以潦草追咎  
矣今仰蒙

指授衷輯成編者凡經部六十六種史部四十一種子  
部一百三種集部一百七十五種共四千九百二  
十六卷菁華已採糟粕可捐原可置不復道然蒐

羅編輯亦不可沒其創始之功故附存其目併具  
載成書之始末俾來者有考焉

原始秘書十卷

浙江范懋柱家  
天一閣藏本

明寧王權撰權有漢唐秘史已著錄是書體例與  
事物紀原相類而荒謬特甚如謂醜婦始嫫母妬  
婦始尹吉甫妻淫婦始柳宗元河間婦傳者不一  
而足甚謂自縊始申生飲酖始叔牙自刎始吳王  
夫差其陋殆不足辨也

羣書拾唾十二卷

浙江巡撫  
採進本

明張九韶撰九韶有元史節要已著錄其書仿王應麟小學紺珠之例以數記事分十二門共一千一百二十五條頗便檢閱然特餽脩之學李登序謂其超出乎類聚通考等書則過論矣

羣書備數十二卷

內府藏本

明張九韶撰核檢其文與羣書拾唾一字不異益書肆重刊改新名以炫俗也

姓源珠璣六卷

左都御史張若淮家藏本

明楊信民撰信民江陰人永樂中官日照縣知縣

是編以洪武正韻分隸諸姓而各系古之名人於姓下分爲八十一類各以四字標題別爲編目於卷首書與錄絕不相符體例極爲叢脞其中乖舛尤不勝摘如梁姓列梁武帝梁簡文帝黃姓列黃帝舜姓列舜唐姓列唐高祖唐明皇唐文宗宋姓列宋明帝宋武宗宋徽宗宋山陰公主已爲無理至揚姓首列揚雄次列一名曰揚州鶴注其下曰嘗有四客各言志一願爲揚州刺史一願有錢十萬一願騎鶴上昇一兼言腰纏十萬貫騎鶴上揚

州則始於戲具矣前有宣德七年王直序稱太宗在位時修永樂大典徵天下文學之士集館閣信民與焉當時所用之人如是宜二萬餘卷之書皆割裂龐雜紛如亂絲也考明史列傳宣德中有楊信民浙江新昌人官至僉都御史巡撫廣東以循良稱亦與王直同時其擢廣東左叅議卽直所薦蓋名姓偶同與著此書者非一人云

羣書纂類十二卷

內府藏本

明袁均哲撰均哲字庶明建昌人正統中官郴州

知州是編因臨江張九韶羣書備數補其缺遺加以注釋凡十三門百二十三事千四百三十四條

韻府續編四十卷

內府藏本

舊本題元青田包瑜撰考括蒼彙紀包瑜字希賢  
青田人景泰庚午舉人官教諭著有周易衍義黃  
虞稷千頃堂書目載包瑜周易衍義註曰成化中  
浮梁知縣則瑜實明人觀書中所列部分已用洪  
武正韻是其明證蓋鬻書者以其板似麻沙故割  
去原序僞爲元刻耳其書補陰氏韻府羣玉之遺

叢脞龐雜殊無可采惟間附考證案語與韻府羣玉體例小有不同

策府羣玉三卷

江西巡撫採進本

明何喬新撰喬新有周禮集注已著錄是編乃私備對策之用據拾補綴不足以言著書蓋康熙甲辰其裔孫在闔欲刊印檄邱全集而力不能及謀之其友魏應桂先刻此書取其易於剽竊可炫俗目人必爭售冀借紙墨之贏資以助全集剞劂之功其用心良苦然以射利之故使喬新以此等書

傳殊非喬新意也

典籍便覽八卷

安徽巡撫採進本

明范泓撰泓字本涵婺源人書前題新安員一隱士蓋未仕者也其書分天象月令地勢經世德行言語政事文學人類物類十部每部又各分子目所采故實不免蕪雜墨漏之譏

羣書集事淵海四十七卷

浙江巡撫採進本

不著撰人名氏明史藝文志以爲宏治時人編蓋據高儒百川書志所載也考李東陽懷麓堂集有

此書後序稱國初人所輯內官監左少監賈性在司禮購而得之捐貲鏤板病其字太小募善書者錄之稍拓其式是此書本出自明初百川書志特據賈性重刻之本遂誤以爲宏治間人耳其書分門十分子目五百七十二集諸書事迹自春秋迄戰國凡數千條條下各注所出皆陳因習見又門目繁碎配隸或多不當引據亦多舛誤殊無足採錄卽李東陽及劉健原序亦深致微詞云

涉覽屬比四卷

兩淮鹽政  
採進本

明朱文撰文睢州人未有自跋稱書成於正德乙巳然正德紀年無乙巳或乙巳誤也其書每條以古人二事相似者合而論之事皆習見議論亦膚淺自跋謂事之同異未得以類而論時之先後弗克以次而序以是爲歉蓋欲爲類書而未成云

文安策畧十卷

江西巡撫  
採進本

明劉定之撰定之有易經圖釋已著錄是書乃所擬場屋對策之作分經書子史吏戶禮兵刑工各爲一科周榮作定之年譜記此書成於宣德九年

甲寅時定之止二十六歲尙未登第蓋其揣摩程試之具後正德癸酉刊所作呆齋集時已編入集中此其別行之本也

謝華啟秀八卷

內府藏本

明楊慎撰慎有檀弓叢訓已著錄是書取諸書新艷字句裁爲對偶自二字以至八字各爲一卷其八字以外者自爲一卷其二字類中無對句者十五條三字類中無對句者四條四字類中無對句者三十二條蓋未完之本中間或注出典或不注

出典卽注者亦不詳悉尤非著書之法蓋偶然劄記以備駢體之用後人得其殘稿刻之耳其曰謝華啟秀取陸機文賦中語也然其中多全引舊文兩句舊詩一聯者殊乖其命名之義又如鋒蝟谷嶠柳宗元平淮夷雅之成句卽析爲二字之對已屬陳因兼傷割裂然猶列柳名也至巢父壺公爲庾信小園賦舊對則竟沒其名矣卉服注曰漢書竟忘禹貢王世貞謂慎求之六合之外而失之目曉之前其此類耶至於吳牛魏鵠明載初學記中

抄類書以爲類書何必慎始能之也四字以下對偶益不工整如以咸則三壤對畫爲九州以作法於涼對誰能執熟則虛實字顛倒便娟輕麗對犀角豐盈銖兩全不相稱以季氏八佾舞庭對管仲三歸反坫偏枯尤甚甚乃以胡燕胥斑聲大對越燕紅襟身小則亘古四六無此複句以農爲邦本本固邦寧對民生於勤勤則不匱改竄經文仍不配偶則益拙矣

均藻四卷

內府藏本

明楊慎撰其書乃韻府羣玉之流案許慎說文無  
韻字小學家以均字代之引鵠冠子五均爲證慎  
之立名蓋取於此然亦太粉飾矣假借通用之法  
可行於古不可行於今也且全書不用古字獨於  
書名用一古字是亦何足爲古乎

哲匠金桴五卷

浙江吳玉墀家藏本

明楊慎撰採摘漢魏以後詩雋句及賦頌之類分  
韻編錄然徵引龐雜掛漏亦多不足重也

可知編八卷

浙江巡撫採進本

舊本題明楊慎撰亦隸事之書然升庵書目不載此名其書分天地人三部又分子目三十八援引踏駁必坊賈所依托也

王制考四卷

浙江朱彞尊家  
曝書亭藏本

明李黼撰黼無錫人是書採經史中有關制度者以周禮禮記春秋左傳國語凡先王之法類聚於前以史記漢書以下凡後世之法類聚於後統爲七十四篇自序謂他日下陳場屋上對明廷蓋爲舉業對策設也其書成於正德中本四卷朱彞尊

經義考誤作一卷且此書雜採經史自分門類非疏解禮記之王制彞尊列之禮記亦爲失考蓋彞尊原注未見特循其名而錄之故有此失也然此本實出自曝書亭或藏收浩繁自不及檢歟抑得此本時已在經義考後也

經世格要二十八卷

浙江巡撫採進本

明鄒泉撰泉有尙論編已著錄是書成於萬曆中其例以故實分隸六官六官之中又各立子目附以諸儒之論較坊本類書頗有條理然所採掇大

抵不出文獻通考大學行義補諸書爲程試之具  
則有餘備考古之資則不足也

物原一卷

兩淮馬裕家藏本

明羅頤撰頤字儀甫浙江山陰人以宋高承事物  
紀原不能黜妄崇真故更訂此編分十八門共二  
百三十有九條然紀原猶著出典頤乃溷衆說而  
一之疎舛彌甚如謂烏孫公主作琵琶張華作苦  
紙皆茫乎不知本事者也

五車霏玉三十四卷

兩淮馬裕家藏本

明吳昭明撰汪道昆增訂昭明始末未詳道昆字  
伯玉歙縣人嘉靖丁未進士官至兵部左侍郎明  
史文苑傳附見王世貞傳中是編於諸類書中掇  
拾殘剩割裂餽又皆不著其出典蓋兔園冊子  
之最陋者道昆尙未必至是疑坊刻託名也

修辭指南二十卷

江蘇巡撫採進本

明浦南金編南金吳縣人嘉靖壬午舉人官國子  
監助教是編取爾雅左腴漢雋書敘指南四書彙  
爲一編分二十部四十類輒轉稗販殊無可觀

左粹類纂十二卷

浙江吳玉  
墀家藏本

明施仁撰仁字宏濟長洲人嘉靖戊子舉人茲編以左傳所紀之事分十五門編載變解經之書爲類事之書去春秋之義遠矣

騷苑四卷

兩淮鹽政  
採進本

前三卷明黃省曾撰後一卷張所敬補省曾有西洋朝貢典議已著錄所敬字長興自署曰清河疑從郡望也是編摘楚辭字句以供剽剟之用亦劉攽文選雙字之類而併泯其篇題則尤簡畧所敬

所續乃併劉勰辨驥篇亦摭入之蓋以楚詞刊本附載此篇也亦可謂隨手摭拾不核端末矣

駢語雕龍四卷

浙江巡撫採進本

明游日章撰日章字學絅莆田人嘉靖乙未進士官至知府是編以駢偶之詞類隸古事蓋合初學記事類賦之體而一之分十七門一百五十八子目內惟官制一門頗詳其餘挂漏殊甚如天文有星及老人星而不載日月有雲雨露雪而不及風雷地理則止言河器用亦止及扇燭兩種其棄取

殊不可解晉安林世勤爲之註釋自謂引書至六百七十餘種而蕪雜亦多皆無足取陳繼儒嘗刻入普秘笈中此其別行之本也

詩學事類二十四卷

內府藏本

舊本題明李攀龍撰攀龍字子麟厯城人嘉靖甲辰進士官至河南按察使事迹具明史文苑傳是編纂輯故事分二十四門觀其所載大都簡陋攀龍與王世貞共倡古學謂學者不當讀唐以後書歸有光諸人排之甚力然其學終有根柢不應疎

蕪至此必託名也

韻學事類十二卷

內府藏本

舊本題明李攀龍撰分韻隸事惟有上下平聲蓋僅備律詩之用龐雜弇陋亦僞託也

韻學淵海十二卷

內府藏本

舊本題明李攀龍撰唐順之校其書前無序例名曰新刊增補古今名家韻學淵海大成蓋取坊間僞托攀龍所著韻學事類詩學事類二書合併成編於僞書之中又爲重儻矣

姓匯四卷

浙江汪啟淑家藏本

明陳士元撰士元有易象鈞解已著錄是編乃其歸雲集中之一種故標曰別集其說謂姓氏之源由來已久因推本於五帝分列世系兼綜而條貫之然大槩抄撮氏族畧之文鮮有考訂夫自有天地卽有君民據姓氏書所說無不出自神明之後卽至微者如倉庾之類亦出世官然則洪荒以後秦漢以前其庶人皆後嗣殄絕乎是正可姑妄言之姑妄聽之耳而士元又拾其餘唾著爲此書是

亦不可以已乎

姓觿十卷

浙江汪啟淑家藏本

明陳士元撰是編亦其歸雲別集之一種據摭姓氏諸書依韻編輯畧載源流支派凡平聲一千七百一十四姓上聲六百八十九姓去聲六百一姓入聲六百二十一姓外蕃九十九姓不入韻中共三千七百二十四姓徵引寡陋且多疎舛又在凌迪知萬姓統譜之下

名物類考四卷

副都御史黃登賢家藏本

明耿隨朝撰隨朝號敬庵滑縣人嘉靖丁未進士官至山西按察司副使是書詮釋名物分十五門蓋爾雅之支流而往往闡入故實已爲自亂其例又皆不著出典如春曰蒼天云云是爾雅之文也東曰變天云云是呂氏春秋之文也而爰接以欲界六天色界十八天云云是儒異混爲一說矣天神曰昊天上帝云云爰接以風神曰封媿是經典與小說聯爲一例矣至於所引故實動輒舛謬如程邈作飛白蔡邕作章草之類已爲顛倒甚至謂

古之善琵琶者曰昭君是不亦齊東之語乎

異物彙苑五卷

直隸總督  
採進本

舊本題明王世貞撰世貞有弇山堂別集已著錄是書分二十七門大抵據摭類書冗碎無緒且刪改原文多失本意世貞著述狃悟失實或有之亦何至陋劣如此乎其僞不待問矣

彙苑詳註三十六卷

內府  
藏本

一名類苑詳註舊本題明王世貞撰鄒善長重訂善長不知何許人其書成於萬曆乙亥明史藝文

志亦著錄凡二十七部首列引用書目似乎浩博其實就唐宋諸類書採掇而成觀官職門中所列皆用宋制知爲剽剟事文類聚合璧事類而成矣疑亦託名世貞者也

古今類腴十八卷

江蘇巡撫  
採進本

不著撰人名氏前有吳一鵬序云是王麟洲所作麟洲王世懋別號也所著却金傳已著錄是書分十門一百二十一子目皆採掇成語以備舉業之用殆坊刻陋本必不出世懋之手

彊識畧四十卷

內府藏本

明吳夢材編夢材字國賢崇陽人其書分三十九類類各一卷惟雜志分上下二卷皆剽剟類書畧爲聯貫成文弇陋殊甚卷端刻王世貞批二行云彊識畧奇書也梓之必傳第入梓時不可不更詳慎則世貞已婉諷之矣何夢材不悟猶引以爲重耶

考古辭宗二十卷

浙江汪啟淑家藏本

明况叔祺編叔祺字吉甫高安人嘉靖庚戌進士

官至貴州提學僉事是書以浦南金所編修辭指南爲藍本而增抄文選雙字類要於各類之下一切分目體式及每類之前半皆仍浦氏之舊因人成事不足尙也

雜俎十卷

兩淮馬裕家藏本

明劉鳳撰鳳有續吳中先賢贊已著錄是書分八類曰元覽稽度地員兵謀藻覽原化問水詞令鳳爲文好刺取隱僻以爲奇故是編皆摘錄古書字句以備剽剟或註出典或不註出典亦漫無義例

不免爲餽釘之學

國憲家獻五十六卷

浙江巡撫採進本

明王可大撰可大字元簡南京錦衣衛人嘉靖癸丑進士官至台州府知府是書凡分十四部曰憲典曰象緯曰機祥曰輿圖曰事理曰文史曰醫藥曰滑稽曰方技曰詭異曰權術曰雅適曰遺事曰大統皆雜採故事依類排纂然端緒錯雜古今混糅如事理部會稽一條不入於輿地子午之年五月戌酉一條不入於機祥之類則分部亦未允也

又如謂人鬼設戶之外天神地祇之不見於經者  
諸儒不必強爲之說今考周禮大祝云凡大禋祀  
則執明水火而號祝隋釀逆牲逆戶注云禋祀祭  
天神也又節服氏云郊祀裘冕二人執戈送逆戶  
尚書大傳維十有三祀帝乃稱王而入唐郊猶以  
丹朱爲戶國語晉祀夏郊董伯爲戶周禮士師若  
祭勝國之社稷則爲之戶春秋傳周公祀太山召  
公爲戶何謂天神地祇用戶不見於經傳耶其考  
核之疎往往類此蓋徒取浩博之故也

文選錦字二十一卷

浙江巡撫採進本

明凌迪知撰迪知有左國腴詞已著錄是書以文選字句輯爲二十七門自謂合清江劉氏類林眉山蘇氏雙字類要而增損之然二家之書已涉餽訂疊牀架屋尤爲無謂矣

羣書纂粹八卷

浙江吳玉墀家藏本

舊本題明徐時行編案明申時行初寄養於徐氏從其姓此蓋其未復姓時作也所著有書經講義會編已著錄是編掇摘諸家議論之文分類纂輯

以備策論之用不足以言著述殆其應舉時所私  
抄而傳寫者授之梓歟



欽定四庫全書總目

子部

卷一百三十九

欽定四庫全書總目卷一百三十八

子部四十八

類書類存目二

續文獻通考二百五十四卷

通行本

明王圻撰圻有東吳水利考已著錄是編續馬端臨之書而稍更其門目大旨欲於通考之外兼擅通志之長遂致率於多岐轉成躊駁蓋通考踵通典而作數典之書也通志具列朝爲紀傳其畧卽志其譜卽表通史之屬也其體裁本不相同圻旣

兼用鄭例遂收及人物已爲泛濫而分條標目又復治絲而棼如各史有不臣二姓之人不過統以忠義折則別立忠隱一門各史於忠孝節烈之婦女不過統以列女折則別立忠婦孝婦節婦烈婦諸門各史於篤行畸節不過統以孝義折則別立順孫義夫義女義徒義母義妾義僕諸門均乖史法至於義物一門孝釋一門尤爲創見罕聞各史但有儒林宋史別出道學傳已爲門戶之私折更立道統考而所收如楚元王之類不過性喜聚書

范平王接之類不過隱居高尙去取更爲不倫此  
皆牽於通志紀傳之故也他如田賦考內所載免  
租當列於賑恤門貴州鹽引課宜列於鹽鐵門打  
青草喂養馬匹事例宜列於兵考而皆誤載於田  
賦國用考內漕運門載金天興元年運餉汝州兵  
此乃用兵轉餉非漕運也又海運已自列一門而  
雜出於漕運之內所載海道遠近尤爲不詳運官  
選補屬選舉考績之事更不當列於漕運門土貢  
考內所載明制其時雖已歸折於一條鞭之法然

尙有解赴內府之項載於明會典者甚詳乃皆脫畧選舉考內所載邵元節李孜省乃一時恩倅不當別立方伎選舉一門學校考內所載州縣書院元制官置山長猶屬學校之支流明則處處私置志書尙不能悉登此書乃泛載之殊爲冗濫職官考內載元職官僅本元史其上京分署載於析津志諸書甚詳見元人集者尤夥乃皆漏畧謚法考祇引史記餘多挂漏卽朱謀璋所輯諸篇萬曆初尙存不容嘉靖末不見亦爲挂漏經籍考內所載

南宋諸人文集尙不及文淵閣書目之半金人文  
集載於中州集小傳者百有餘家所載僅十之一  
二而琵琶記水滸傳乃俱著錄宜爲後來論者之所譏六書考全抄鄭樵六書畧又錄唐韻及宋禮部韻畧各序毫無斷制所載法帖僅明代所刻賢堂帖十數則又旣立經籍考一門復於六書考內複載字學書法各書更爲舛雜至於釋家一門本可不立旣已立之而宗律二門未能分晰列釋家法嗣一門而二祖六祖以下旁出法嗣又未能

詳叙殆進退無據矣自明以來以馬氏書止於宋  
嘉定中故多存圻書以備檢閱今蒙

特詔儒臣重爲纂輯業已勒有成書圻之舊笈竟以覆  
瓿可也

案此書雖續文獻通考而體例迥殊故文獻  
通考入故事此則改隸類書

三才圖會一百六卷

浙江巡撫  
採進本

明王圻撰是書彙輯諸書圖譜共爲一編凡天文  
四卷地理十六卷人物十四卷時令四卷宮室四

卷器用十二卷身體七卷衣服三卷人事十卷儀制八卷珍寶二卷文史四卷鳥獸六卷草木十二卷采摭浩博亦有足資考核者而務廣貪多冗雜特甚其人物一門繪畫古來名人形像某甲某乙宛如目睹殊非徵信之道如據倉頡四目之說卽畫一面有四目之人尤近兒戲也

正音擴言四卷

直隸總督  
採進本

明王荔撰荔字子巖高陽人嘉靖中舉人官至青州府推官是書以等韻分二十二部而又非韻書

如京字部爲第一則云天對地日對星曉燕對春  
鶯云云蓋鄉塾屬對之本而首標葉向高選鹿善  
繼閱似乎必無其事其李國楷序殆亦贗托也

亘史鈔

無卷數  
總督採進本  
兩江

明潘之恒撰之恒有黃海已著錄是書明史藝文  
志作九十一卷編首顧起元序云內紀內篇以內  
之而忠孝節義懿行名言之要舉外紀外篇以外  
之而豪傑奇偉技術艷異山川名勝之事彰雜記  
雜篇以雜之而草木鳥獸鬼怪瑣屑恢諧隱僻之

用列紀以類其事篇以類其言內之目十七外之  
目三十雜之目三十二爲目七十九爲卷九百九  
十有六今是編僅存內紀內篇蓋殘缺不完之本  
然體例糅雜編次錯亂其全書已可見一斑矣

楚騷綺語六卷

浙江巡撫  
採進本

明張之象編之象有太史史例已著錄是書摘楚  
辭字句以供擣撦已爲剽剟之學又參差雜錄於  
二十五賦不復著出自何篇亦與黃省曾騷苑同

一紀陋

褚記室十五卷

浙江汪汝  
栗家藏本

明潘埙撰埙有淮郡文獻志已著錄是書分天地人三部每部又各分子目大抵抄撮而成冗雜特甚又多附錄前明事實間以委巷之語尤有乖雅馴也

註釋啟蒙對偶續編四卷

內府  
藏本

明孟紱撰鄭以誠注紱以誠皆始末未詳其書按韻屬對自一二字至十餘字不等每韻三則蓋鄉塾啟蒙之本也紱書成於嘉靖中以誠注成於崇

禎中前有周燦序謂書稱續編必原有初編而逸之是初刊之時已非完本矣

三通政典

無卷數  
巡撫採進本

江蘇

不著撰人名氏并不著書名江蘇採進遺書目錄題曰三通政典亦不知何據也其書皆場屋策料每題爲論一篇篇末或云爲聖明獻爲執事獻其稱明世宗曰今上叙無錫山川人物曰愚也幸生於斯蓋嘉靖間無錫人所作也

類雋三十卷

內府  
載本

明鄭若庸撰若庸字虛舟崑山人少爲諸生以任  
俠不羈見斥客趙康王厚煜邸中厚煜給以筆札  
令其倣初學記藝文類聚越二十年而成此書凡  
分二十門江南通志文苑傳謂若庸爲趙王著書  
採掇古文奇字累千卷名曰類雋蓋未見其書傳  
聞失實之詞不足據也沈德符敝帚軒剩語謂其  
書與俞安期唐類函俱有功藝苑安期亦雅慕鄭  
書以不得見爲恨久之而太學生汪琪者始爲梓  
行然徵引太簡叙事多不得首尾未足以爲善本

含元齋別編十卷

浙江朱彝尊家  
曝書亭藏本

明趙樞生撰樞生字彥材徽州人據其子願光後跋樞生所著諸書皆無錫顧治排纂成帙有內編外編遺編別編賡編案賡古文續字  
將編卽續編也通二十四卷

此別編十卷則所纂輯故實也跋稱分十八門而書中實十九門其次序又與目錄不應殆偶然劄記以備遺忘本無意於著書故事無始末亦不詳其出典後人強爲編次遂餽劄割裂不堪卒讀其最無義理者莫若同仇考一門如云宋真宗時契

丹耶律休哥死其年樞密使兼侍中曹彬亦卒又云帝昺時陸秀夫張世傑負帝死於海其年元西僧八思巴亦死諸如此類竟不解其何意也

古雋考畧六卷

內府藏本

明顧充撰充有字義總畧已著錄是書摘錄古人雋語爲類三十有四附以註釋亦間有考証未有重刻自跋稱始集古雋於定海學宮鏤板行之而嫌其未備更加增輯云云然究亦未能精核也

藝圃萃盤錄十卷

浙江巡撫採進本

是書分類標題各繫以總論蓋經生揣摩對策之本卷首題曰丁卯解元用齋周汝礪選戊辰進士貞菴蔣以忠纂丁卯同年養菴蔣以化輯竟不知實出誰手也

三才考略十二卷

江蘇巡撫採進本

明莊元臣撰元臣字忠原歸安人隆慶戊辰進士是書備科舉答策之用分十二門皆摭通典通考諸書爲之其目列樂律第九書中乃第六目列漕河第十二書中乃第九目列學校第八書中乃第

十一目列兵制第十一書中乃第十二蓋卷帙之先後尙未及檢校矣

翰林諸書選粹四卷

內府藏本

明張元忭撰元忭有紹興府志已著錄是書采掇諸子之語分編二十五類其第四卷臣道類外又分吏戶禮兵刑工六科門目殊嫌冗雜

黔類十八卷

安徵巡撫採進本

明郭子章撰子章有蠻衣生易解已著錄是編爲其巡撫貴州時所輯故曰黔類實隸事之書非黔

志也凡分三十六門自序稱取古今軼事僻事類之經書人所共讀者畧類書已載者畧然皆耳目習見殊罕異聞且多引玉海太平御覽輒轉稗販割裂失真並迷其本書之出處而云類書已載者畧豈其然乎

祝氏事偶十五卷

浙江巡撫  
採進本

明祝彥撰彥字元美山陰人萬曆癸酉舉人其書取史傳所載古人事蹟之相同者倣世說新語門目分條徵引以類相從舊日所不該者復分天地

人三部以隸其後自序稱因見余寅同姓名錄而作蓋彼以名同而此以事同義相仿而例則各殊大致與同時陳禹謨之駢志約畧相似而不能及陳書之精密每條後間綴評語詞意儂薄彌爲畫蛇之足

廣修辭指南二十卷

浙江巡撫  
採進本

明陳與郊撰與郊有檀弓集註已著錄是書分二十部每部或分子目或不分子目各列浦南金修辭指南原文於前而增續於後每類所補不過十

數條又不多著出典殊無可取

繻綯對類二十卷

內府藏本

舊本題明屠隆撰隆有篇海類編已著錄是編採對偶字句自一字至四字各區門類皆市井幃軸之詞其首載習對歌之類尤俚陋可資笑噱隆雖佻蕩不檢遊談無根然其謬尚不至此殆坊賈所托名也

何氏類鎔三十五卷

兩江總督採進本

明何三畏撰三畏有雲間志畧已著錄是編取類

書典故以駢語聯絡成文每類各爲一篇以便記誦卽宋吳淑事類賦之意但不爲韻語耳然皆不著出典事無原委不便引用亦不及淑所自註淹洽也

事詞類竒三十卷

兩江總督  
採進本

明徐常吉撰常吉字士彰武進人萬曆癸未進士官浙江按察司僉事是書爲類二十有四其序次先經後子史以及仙釋之屬分門輯事依類選詞其條下註釋則吳人陸伯元作也

六經類聚四卷

江蘇周厚  
靖家藏本

明徐常吉編陶元良續增元良字乃永武進人是書以六經之語分類爲十八門以備時文剽剟之用

春秋內外傳類選八卷

江蘇巡撫  
採進本

舊本題明進士楚潛樊王家撰其始末無考太學進士題名碑萬曆癸未有三甲進士樊王家湖廣潛江人當卽其人也其書以左傳國語各標題目分編二十三門以備時文之用間旁註音訓一二

字亦皆淺陋與經學毫無所關而又非文章正宗選錄左傳之例無類可附姑從其本志入之類書類焉

奇姓通十四卷

浙江汪啟淑家藏本

明夏樹芳撰樹芳有栖真志已著錄是編以楊慎所輯希姓紀錄未備因復考之上古下迄於明取姓氏之不經見者分韻編次複姓則另編於後然引据未博體例亦往往疎舛如廣韻東字下所收古人至多今止錄東不訾一人又眉間尺引吳越

春秋而吳越春秋無此文又凡慎書所已採者則竟標升庵集云云而不載引用書目俱不免於駭也

異物彙苑十八卷

浙江巡撫  
採進本

明閔文振撰文振字道充浮梁人其書分二十七部襍採傳記奇異之事然亦多世所舊見無出人耳目之外者如峴稱縊女一條注云出爾雅而爾雅實無此文則其徵引亦不足盡據也

廣蒙求三十七卷

浙江巡撫  
採進本

明姚光祚撰光祚字允昌吳縣人萬曆戊子舉人官保定府同知宋王逢原有十七史蒙求十六卷光祚以其未備從而廣之分三十七類然但有對偶而無韻既不適童幼之誦讀註又簡畧益無可取

男子雙名記一卷

編修程晉  
芳家藏本

明陶涵中撰涵中字雪凡嘉興人萬曆戊子舉人官至建昌府同知所記古今男子如殷七七王保保之類凡二十一人自叙謂友人過飲以此爲酒

令坐中各舉所知遂筆記之然如趙秉文之閑閑  
居士乃別號而非名又以余闕爲余闕闕不知何  
所據也

秘笈新書十三卷別集三卷

山西巡撫  
採進本

明吳道南編道南有河渠志已著錄是書自序以  
爲本謝枋得未及付梓之書爲之增補然所載皆  
職官故實故標題有簪纓必用字別集首卷爲君  
道二卷三卷爲類姓割裂瑣碎尤多挂漏斷非枋  
得所作蓋後人假其名以取重道南未及詳考耳

事物紺珠四十一卷

浙江巡撫  
採進本

明黃一正編一正字定父揚州人是編成於萬曆辛卯明史藝文志著錄四十六卷今考其目自天文地理至瑣言瑣事凡四十六目非四十六卷也所錄典故率割裂餽併又槩不著原書之名是雖杜撰以盈卷帙亦莫得而稽矣

姓氏譜纂七卷

浙江巡撫  
採進本

舊本題明李日華撰日華有梅墟先生別錄已著錄是書稱所列姓氏一依百家新箋新箋者湘潭

黃周星所編以朱王萬壽爲首句者也然周星爲崇禎庚辰進士新箋後有自跋稱成於崇禎丁丑日華爲萬厯壬辰進士沒於崇禎初其作是書不應反用周星之新箋殆出僞託其書不詳譜牒世系而廣引人物非濫卽漏雖日華以書畫擅名不長於考證亦不應謬漏至此也

時物典彙二卷

浙江巡撫採進本

舊本題明李日華撰是書僅一百三十九頁雜剽類書故實餕釤成帙舛謬百出卷首題魯重民補

訂錢蔚起較正或卽二人所託名歟

對制談經十五卷

浙江吳玉墀家藏本

明杜涇編涇西安人其始末無考是書成於萬曆甲午因宋葉時禮經會元舊文百篇散出無緒乃分類排纂立十五門以統之以其可資制科之用故易今名然葉書四卷本有次第涇以不便擣擣改爲類書且於原文頗有汰節非古人著書本志也

諸書考錄四卷

內府藏木

明徐鑒撰鑒字觀父豐城人萬曆辛丑進士官監察御史提督應天學政是編採諸書新艷字句分三十六門而地理一類又自分都邑山水雜錄三門實三十八門摭拾寒窶殊罕創睹又多不註出典其注出典者亦多刪改原文勘驗本書率不相應蓋皆剽竊於類書之中非根柢之學也

諸經紀數十四卷

浙江巡撫採進本

明徐鑒撰是書於十三經成語中摘取其數以類相比自一數至萬數其有一句兼諸數者則別稱

爲疊數而無數目字者不錄各標本語畧引上下文及注疏附於其下蓋欲仿小學紺珠之例然雜事不妨類隸豈容割裂聖經以供擣撋也

八經類集二卷

江蘇巡撫採進本

明許獮撰獮字子遜同安人萬曆辛丑進士官翰林院編修八經者易書詩春秋禮記周禮孝經小學也獮掇拾其詞分天地倫常學術君道臣道朝政禮樂雜儀世道九類而其姪金礪又刪補而註之所採諸經於三禮獨不及儀禮小學成於朱子

亦不當與六經並列皆爲疎舛解以制藝名一時而所恃爲根柢者不過如此卷首題名之下夾註辛丑會元四字尤未能免俗也

藻軒閒錄補續詞叢類採八卷

兩江總督  
採進本

明林濂撰濂字元盛福州人官廣東三水龍門二縣教諭終於昌化縣知縣是書成於萬曆庚戌雜採古書之詞分一百六十門頗爲繁碎蓋爲課龍門諸生而作藻軒者龍門學署齋名也據其自序尙有前集故此曰續採云

輿識隨筆一卷

兩淮鹽政  
採進本

明楊德周撰德周有澹圃芋記已著錄是書雜采經史奇字抄撮成帙多引原註發明甚少

事言要元三十二卷

浙江巡撫  
採進本

明陳懋學撰懋學字希賢福唐人萬曆壬子舉人官兵馬司指揮是編分類隸事凡天部三卷地部八卷人部十四卷事部四卷物部三卷取提要鈎元之義以名其書然蕪雜太甚不稱其名

獅山掌錄二十八卷

浙江吳玉  
墀家藏本

明吳之俊撰之俊字彥章號芝房歙縣人萬曆癸  
丑進士官武強縣知縣是編纂輯故實特取雋穎  
其每卷標目亦喜爲新異曰甄元曰控輿曰挈壺  
曰采真曰測符曰提靈曰綜披曰緯闕曰襄奮曰  
延清曰宣籟曰緝章曰簡棲曰合雋曰挹溫曰薈  
芳曰循蜚曰登脂曰抽騎曰犁潛曰苑萌曰連蟠  
曰游環曰折致曰詮際曰拾瓊凡二十六類然多  
不著出典亦稗販之學而已

諸經纂註三十四卷

江蘇周厚  
堉家藏本

明楊聯芳編聯芳字懋賞漳州人是書成於萬曆癸丑以諸經割裂分類而各註字義於旁以便記誦

駢字憑霄二十四卷

江蘇巡撫採進本

明徐應秋撰應秋字君義號雲林浙江西安人萬曆丙辰進士官至福建布政使是書皆采掇經史駢連之字備詞藻之用凡註義十卷釋名十四卷每卷又各分子目皆畧爲註釋而不盡著出典大概剽諸朱謀埠駢雅居多殊餒尙不足依據其名

憑霄者自註引王嘉拾遺記曰蒼梧有鳥名憑霄能吐五色氣又吹珠如塵積珠成壘名書之義取此云云非惟險僻無義理且攷之嘉書是舜帝南巡葬於蒼梧之故實尤非佳事可謂迂怪不經矣

經濟言十二卷

兩江總督採進本

明陳子壯編子壯字集生南海人萬曆己未進士官至禮部侍郎晉尚書明亡殉難事迹具明史本傳是編掇輯諸子名言自管韓迄唐宋分類標題以供程試之用非真爲經濟作也

事文玉屑二十四卷

安徵巡撫  
採進本

明楊淙撰淙不知何許人是書明史藝文志著錄  
然二十六類之中荒唐俚謬罄竹難書明人著述  
之陋殆無出其右矣

朱翼

無卷數  
巡撫採進本  
浙江

明江旭奇編旭奇字舜升歙縣人萬曆中官安岳  
縣縣丞江南通志列之儒林傳稱其在太學日嘗  
奏上所著孝經翼孝經疏義併請勅儒臣補成孝  
經大全命題取士蓋亦講學之家然是書則僅供

場屋之用故許成智序謂亦名論策全書蓋爲舉業而設凡分六部曰管窺曰曝愚曰調燭曰完甌曰委質曰志林每部之中又各分子目皆攢摭諸書以類排纂而是非一斷以朱子故名朱翼中多引釋典道書殊乏別擇甚至採及水滸傳尤龐雜不倫實與朱子之學南轍北轍也

史說萱蘇一卷

兩淮鹽政採進本

明黃以陞撰以陞字孝義龍溪人是書取史事之相類者隨筆記載間加評騁自序謂臯蘇釋勞萱

草忘憂故以萱蘇爲名然闕漏殊甚尙在後來方

氏古事比之下也

唐類函二百卷

內府藏本

明俞安期編安期初名策字公臨後改今名字羨長萬厯末布衣此書取唐人類書刪除重複彙爲一函分四十三部每部皆列藝文類聚於前而初學記北堂書鈔六帖次之取材不濫於諸類書中爲近古惟時令兼取韓鄂歲華紀麗未免非前四書之倫又事關政典者旣剏取杜佑通典補之又

寥寥數條挂一漏萬體例皆爲未善且顛倒補綴訛舛亦多同時吳允兆亦有是編但無六帖議者謂兩書並出殊爲無謂允兆遂舉以讓安期其中體例亦有兼采允兆書者安期凡例嘗言之不自諱也又宋國楨湧幢小品曰俞羨長山人刻類函二百卷盛行於時然世廟時原有此書乃鄭虛舟山人奉趙康王命纂之累年書成而鄭卒於清源其子獻之得厚賞不知視今何如云云然鄭若庸書與此書體例迥異國楨殆未見其本以臆揣之

歎

詩雋類函一百五十卷

內府  
藏本

明俞安期撰是書取皇古以迄唐代之詩彙爲一編自盛唐以前刪去者少中晚以後則多所刊削凡分三十六部七百七十餘類其凡例言以材具爲主以掇拾爲用故但分門摭錄間附以詩話小說又稱焦竑之語以爲藝文類聚初學記諸書所採不載全文因於長篇大什皆加刪削蓋類書之體非總集之例也

類苑瓊英十卷

兩淮鹽政  
採進本

明俞安期編分別事類纂輯故實每條止撮舉二字而以原文細註其下其體例前後頗無倫次又天文一類盡皆缺如疑爲未成之書也

劉氏類山十卷

浙江巡撫  
採進本

明劉嗣昌撰嗣昌字燕及桐城人萬曆中官至興化府知府是書爲目七十所載之事自唐而止較明代類書泛載近事者差爲近古然大抵轉相剽販未見該洽

卓氏藻林八卷

內府藏本

明卓明卿撰明卿字激甫錢唐人萬曆中由國子監生官光祿寺署正是編采類書分門輯錄頗有簡擇而取材未富談遷棗林藝衡謂是吳興王氏之本明卿竊取之攷明卿嘗擴張之象唐詩類苑刊行則是說似亦有據矣

史學璧珠十八卷

浙江巡撫採進本

明錢應充撰應充字子美紹興人萬曆中貢生是書分類隸事以坊本綱鑑爲主而稍據類書附益

之皆集爲偶句以便剽襲冠以歷代帝王歌括中  
分天地災祥君道臣道倫理品論吏部戶部禮部  
兵部刑部工部人身德惡人事官職物類十七門  
又分子目二百三十五如以心學屬之禮部不知  
其何取又品論門中有何如一目尤從古類書所  
未聞自序言書成之日夢一神人幞頭皂袍自稱  
待制包某以其褒貶合義特來勞之又言作序之  
日五星聚奎語皆謬妄卽其書可知也

事典攷畧六卷

江蘇周厚  
靖家藏本

明徐袍編袍字仲章婺源人是書採前代事迹及先儒議論分目凡八十有一割裂經典叢雜瑣碎蓋兔園冊子也

故事選要十四卷

浙江巡撫採進本

明王思義撰思義有宋史纂要已著錄是書採擇子史故事分類編次凡十五門多不註所出動輒舛誤如雪門收絳雪丹事已爲不倫又訛張雲容爲趙容雲則他可知矣

劉氏鴻書一百八卷

浙江巡撫採進本

明劉仲達編仲達字九達宣城人是書分二十四類又分子目二百六十有奇事實詞章相雜而載每條皆註所出較明人社撰之書稍有依據然大抵轉引類書不盡出於本文則亦稗販之學也卷

端題湯賓尹刪定而李維楨序乃稱校讐與有力者爲李成白謝少連賓尹序中亦無一字及刪定事蓋坊賈刊是書時以仲達諸生恐不見重借名於賓尹耳

儒函數類六十二卷

安徽巡撫  
採進本

明汪宗姬撰宗姬字肇邵歙縣人是書明史藝文志作儒數類函蓋刊本誤也所錄故實皆以數統計自一至萬罔不畢具然體例冗雜如二獻條下乃列二齊等謚二十二條如但據標目於何尋檢且名曰儒函當詳於儒而二氏之言仍復采入甚至萬善二字引及太上感應篇不亦慎乎

蟬史十一卷

浙江巡撫  
採進本

明穆希文撰希文有說原已著錄是書專記鳥獸事實故以蟬名分爲羽蟲毛蟲鱗蟲甲蟲諸蟲五

類然蟬乃蠹魚之別目非蟲之總名制名殊謬徵引亦多未賅又中間所稱蟬史曰者卽其本書乃雜廁古書之間反若引用者然於體例亦乖也

婦女雙名記一卷

編修程晉  
芳家藏本

明李肇亨撰肇亨字會泰嘉興人太僕卿曰華之子也所錄古今婦女雙名凡六十七人自序謂王元美弇州卮言張睿文瑤琊代醉編陳無功析醒漫錄中皆有所載而彼此未備暇日偶有所晤卽隨手錄出又兼三書考其出處云

五侯鷗十二卷

兩江總督  
採進本

明彭儼撰儼字若思江西人其書分類隸事凡十四門所載皆不著出典摭拾叢雜無可采錄

文竽彙氏二十四卷

安徽巡撫  
採進本

明傅作興撰作興字廷用建昌人是書彙輯古來姓氏兼載人物分君姓臣姓諸侯大夫公族補遺覆姓各標目上闡而下附偶語一二聯體例已陋至所列系胄皆妄以己意附會之如以皇姓爲出於三皇氏胥姓爲出于赫胥氏桑姓爲出于空桑

氏有若巢父爲出於有巢氏鑿空率合不可枚舉  
非特昧於三代姓氏之辨卽後世譜牒諸家亦全  
未寓目可謂不知而作者矣自序云文本於氏正  
文者宜先正其氏以辨其文而濫竽是懼故以二  
字爲名其說亦支離無義理云

藝林彙百八卷

浙江吳玉  
墀家藏本

明李紹文撰紹文字節之華亭人是編成於天啟  
癸亥因小學紺珠而變其體例摭拾故實不分門  
類不詳出處但以數目爲標題自一至百故名曰

鑿百大抵餽釘疎舛不足以資考證也

十三經類語十四卷

浙江巡撫  
採進本

舊本題明羅萬藻編萬藻字文止江西人天啟丁卯舉人福王時官上杭縣知縣唐王僭號於福建擢爲禮部主事未幾卒故至今時文家稱曰羅儀部明史文苑傳附見艾南英傳中是書因坊本五經類語更取十三經廣之分一百三十四類杭州魯民重又爲之註案萬藻雖僅以時文名家而所學真有原本其時文幽渺湛深純以意運亦决不

用此餽釁之功况其時張溥與張采立復社艾南英與章世純陳際泰及萬藻立豫章社會南英選刻時文塗乙過當爲衆所詬乃取已及三人之文亦分合作摘謬一例塗乙其半刊以示公溥等因以離間其交世純際泰皆爲所動而萬藻恬於名譽獨不從溥今此書之首乃有溥序與嘗曰情事尤爲乖刺殆民重託稱萬藻藉豫章社之名以行又僞撰溥序藉復社之名以取重總之坊賈伎倆而已

廣雅

卷之三

庶物異名疏三十卷

浙江吳玉撰家藏本

明陳懋仁撰懋仁有年號韻編已著錄是編彙輯物名之異者爲之箋疏凡二千四百五十二名分二十五部然多据拾雜說轉相稗販如柔祇雪凝圓靈水鏡謝莊月賦人人習讀而其註稱中書地曰柔祇是併文選未考也大瀛海字山驛衍傳而註曰大瀛海之異名見楞嚴經註是併史記未考也眢井字見左傳而註曰韻書并無水曰眢是三傳亦未考也其他可以例見矣又異名者名之異

者也如虹一名掣貳電一名列缺是也而所列雞  
黍黃目瑞節玉瓊之類乃其本名何以爲異至於  
沙噀泥蟲乃是異物並無別名濫列節臘以充卷  
帙體例亦乖舛之甚也

尙友錄二十二卷

浙江巡撫採進本

明廖用賢編用賢字賓于建寧人是書成於天啟  
中蒐采古人事實以韻爲綱以姓爲目其例一如  
萬姓統譜諸所紀載詳畧失宜無所考證蓋亦爲  
應俗作也

詩學彙選二卷

內府藏本

明胡文煥編文煥有文會堂琴譜已著錄是書卽  
坊本詩學大成中採輯重編凡三十九門所錄詩  
自六朝至於明代妍媸並列殊爲猥雜文煥自序  
文亦陋劣詩學大成本依託於李攀龍此更掇拾  
其殘臘風益下矣

文奇豹斑十二卷

浙江巡撫採進本

明陳繼儒撰繼儒有邵康節外記已著錄是編分  
天文地理人物文史花木鳥獸器用人事釋教字

學十類皆剽竊餕衍之文末一卷分韻編古字尤  
多舛謬

五車韻瑞一百六十卷

通行本

明凌稚隆撰稚隆有春秋左傳評註測義已著錄  
是編因韻府羣玉而稍變其體例每韻之下先列  
小篆一字然後隨韻隸事其排纂之序曰經曰史  
曰子曰集曰雜又以賦頌歌詩之類分體標名綴  
列於後其曰雜者蓋仙經佛典之言考梁阮孝緒  
作七錄以釋道別爲門目不入子家稚隆區而別

之猶爲有說至賦頌歌詩諸體本皆集部之文而別立諸名殊無義例昔陰氏韻府羣玉前人病其龐雜無倫然其時去宋未遠多見舊本故朱彝尊跋其書尙以所引杜詩老去詩篇渾漫與句爲足資考證稚隆此書名爲廣所未備而舛謬彌滋且往往杜撰增添非本書所有如平淮西碑下引舊唐史一條併載入千載斷碑人膾炙不知世有段文昌一句此二句乃宋人之語爲蔡京故撰儲祥觀碑而作舊唐書實無此文如云別一舊唐史則

唐宋以來著錄者實無此目如斯之類觸處皆然  
又出陰氏書下謝肇淛序乃謂韻府羣玉爲耳食  
獨盛推此編可謂曲阿所好矣

五經總類四十卷

內府藏本

明張雲鸞撰雲鸞字羽臣號泰巖無錫人崇禎初  
嘗以所輯經書講義獻之闕下此編復取五經及  
周禮孝經之語分門排比共爲七十二類釐上下  
二集自跋謂大要不外經濟學術兩端上集爲經  
濟下集爲學術今按其目次以天道地道君德臣

德聖學等爲經濟而以衣服飲食器用宮室草木鳥獸等皆入之學術未爲允協然雲鸞此書不過爲舉業之用本不爲經義立言亦無足深論今退置類書類中庶核其實焉

茹古畧集三十卷

浙江巡撫  
採進本

明程良孺撰良孺有讀書考定已著錄是書三十三卷凡三百九十四篇每篇皆采擷藻麗之詞聯爲偶語其體全同事類賦自序稱不奇不已不幽不已不僻不已不合其奇者幽者僻者以成一家言

不已然觀所徵引實了不異人也

古今好議論十卷

編修勵守  
謙家藏本

明呂一經編一經字子傳號非庵吳縣人崇禎辛未進士官至河南提學副使是書輯漢唐以下迄於明季諸儒議論分經學經濟二門經學爲類二十有二經濟爲類二十有四共五百五十六則蓋以備場屋策論之用者也

名物考十卷

內府  
藏本

明劉侗撰侗有帝京景物畧已著錄是書分二十

三部附物理考通微志二篇皆采輯類書而成卷帙無多搜羅甚隘不足以供考核也

六經纂要

無卷數

江蘇

巡撫採進本

明顏茂猷撰茂猷有廸吉錄已著錄考顧炎武曰知錄茂猷鄉試會試皆以全作五經題取旨中式嗣後始立五經中額今觀此書凡分君臣人倫修治三門割剥字句無所發明蓋卽其揣摩之本也自序謂稽古之力食報於諸聖人所見亦云淺矣

事物考八卷

浙江朱彞尊家  
曝書亭藏本

明傅巖撰巖字野清義烏人崇禎甲戌進士官至  
監察御史其書大抵本高承事物紀原而稍爲附  
益兼增入明代地名官制禮儀抄合而成書不免穿  
漏如輿地言舜分十二州不著其名幽并營商周  
異制亦無剖辨又謂漕運爲起於秦之飛輓不知  
管子所載粟行三百里諸條卽漕運之原始載於  
通典者甚詳謂唐始以上柱國爲勲官不知隋制  
勲官已先列上柱國唐特沿隋之舊謂後漢改常  
侍曹爲吏部不知後漢祇改爲吏曹至魏時始改

爲吏部其舛畧往往似此唯所載明初文臣無謚及五軍營制諸條頗足叅證明會典諸書之互異耳

備吹錄首集二十卷次集二十一卷

副都御史黃登賢家藏本

明文德翼撰德翼有宋史存已著錄是書皆采集古人新巧字句蓋沿楊慎謝華啟秀而廣之者然多不著出典時有訛誤間作品題亦皆儂佻之語蓋又兼涉竟陵之習者也

四六霞肆十六卷

內府藏本

明何偉然撰吳正炳吳宗邵增刪偉然有廣快書  
已著錄正炳字訥齋宗邵字敬齋並休寧人是編  
採掇故實撰爲駢偶之詞分類編次而總注於每  
門之後詞既拙俗注尤弇陋殆無一長之可取

廣韻藻六卷

內府藏本

明方夏撰夏字南明白號養春子長洲人是編取  
楊慎韻藻刪其繁複而廣其未備然挂漏仍多惟  
慎書假借均字爲韻字夏獨改從今文立心篤實  
不涉炫俗釣名之習爲寸有所長耳

麗句集六卷

內府  
藏本

明許之吉撰之吉爵里未詳其書采前人儻偶之語或一聯或數十聯分門編次亦楊慎謝華啟秀之類

文苑彙雋二十四卷

浙江巡撫  
採進本

明孫丕顯撰丕顯字啟周自稱閩人未詳其邑里其書分二十九門抄撮類書體例殊爲猥雜

事類通考十卷

浙江巡撫  
採進本

明劉葉撰葉字芝華饒州人是書於古今事實分

類纂輯凡七十七門隸事而間以評論或似劄記  
或似語錄或似對句體例莫能名狀觀其以年少  
初登第皇都得意回十字分標十卷之號則其書  
可知也

策統綱目三十九卷

福建巡撫採進本

明卓有見撰有見莆田人其書以邱濬大學衍義  
補湛若水聖學格物通二書爲本分立四門曰經  
傳格言曰史鑑證義曰諸儒論義曰國朝事實頗  
畧於古義而詳於時務蓋亦林駒源流至論之類

專爲射策而作者

古今事物原始三十卷

浙江巡撫採進本

明徐炬撰炬有酒譜已著錄是書倣事物紀原之體稍附益之而蕪雜太甚蓋制度器數皆可考其淵源至日月星辰山川草木鳥獸蟲魚與天地而俱生豈能確究其始輒轉援引彌見糾紛至於鳥獸花草諸門每類之首或括以偶語一聯或括以律詩一句乃從而釋之尤弇陋之甚矣

古史彙編四卷

浙江巡撫採進本

明韓孔贊撰孔贊字羲一里貫未詳是書據諸史  
典故分四十七門起於唐虞終於明代大致仿文  
獻通考而叙述簡畧僅足供舉業對策之用

子史彙纂二十四卷

浙江巡撫採進本

明馮廷章撰廷章字子建常熟人是書分二十四  
類每類之中又別爲子目雖以子史爲名而亦兼  
采詞賦自序謂一尺之鑿方寸之木無或遺棄又  
謂上極天道下該人事六合之內畧在其間其自  
譽甚力卷首列徵引書目千餘種唐宋諸志不著

錄者十之六七明以來諸家書目不著錄者十之九廷章何自得之乎

類雅二十卷

浙江汪敬淑家藏本

不著撰人名氏中風雨類引蠡海集乃明王達撰又烏類引埤雅廣要乃明牛衷撰則明人作也其書皆由抄撮而成亦往往不詳出典如開卷蔚藍天一條乃陸游老學菴筆記之語而失註書名又曰御一條云天子有曰官諸侯有曰御陳子昂詩還丹奔曰御郊老餌雲芽註曰律歷志何史律歷

志中有此語乎其舛可知矣

萬年統紀十二卷

江蘇巡撫採進本

不著撰人名氏所引明代諸書皆仍其皇明之稱  
則明人矣首紀歷代帝王不以時代爲次而以年  
數爲先後由初生至四萬五千六百歲止爲第一  
卷次紀孔子誕生至七十二歲止爲第二卷以下  
載歷代臣民自初生至一千百有餘歲釐爲七卷  
末載佛氏神仙二家各爲一卷列文爲一卷採摭  
頗富然所徵引多出小說不足爲據也

對類二十卷

兩江總督  
採進本

不著撰人名氏亦不詳時代凡二十門蓋村塾課蒙之本驗其格式猶明中葉所刊也

大政管窺四卷

兩淮鹽政  
採進本

不著撰人名氏皆科舉之策畧也分敘吏敘戶敘禮敘經六曹舉其三而四部舉其一體例無所取義必非完書蓋經生偶存之殘稿耳

汲古編四卷

江西巡撫  
採進本

不著撰人名氏其書雜抄古事分七十三門名目

冗瑣時代顛舛如孔融在北海爲賊所攻流矢雨  
集矛戟內接融憑几安坐云云此謂之鎮靜則可  
而列之智畧門中是未見本傳下文城破融遁之  
事也伊尹耕有莘之野樂堯舜之道三聘就湯阿  
衡作相此自名臣類中事而列之忠烈門中與程  
嬰公孫杵臼相連殆不可理解矣每門之未必留  
空紙數頁蓋隨意雜抄草創未定之本故疏謬如  
是也

天華山房秘藏玉杵臼三卷

浙江巡撫採進本

原本無序錄卷首一行題曰西湖讌赫主人吳培  
鷗九牧父搨培鷗亦不知何許人案六書精蘊讌  
音沓震怖也二龍並飛威靈震赫見者氣奪自號  
必取讌字已極誕妄其搨字之義又因玉杵臼而  
附會之更屬不經觀卷中所載卽取唐類函抄撮  
十之二三去其總類又於諸細目中前後亂其部  
分蓋明季書賈作僞以欺人者也